

SLUŽBENI LIST

REPUBLIKE BOSNE I HERCEGOVINE



СЛУЖБЕНИ ЛИСТ

РЕПУБЛИКЕ БОСНЕ И ХЕРЦЕГОВИНЕ

Godina III - Broj 10

Petak, 6. maja/svibnja 1994.
SARAJEVO

Za svaki broj posebno se
utvrđuje cijena
Žiro-račun 10100-603-1396

192

Na osnovu Amandmana LI tačka 5. stav 3. na Ustav Republike Bosne i Hercegovine, Predsjedništvo Republike Bosne i Hercegovine, na prijedlog Vlade Republike Bosne i Hercegovine, donosi

UREDBU SA ZAKONSKOM SNAGOM O DOPUNAMA UREDBE SA ZAKONSKOM SNAGOM O SLUŽBI DRUŠTVENOG KNJIGOVODSTVA

Član 1.

U Uredbi sa zakonskom snagom o Službi društvenog knjigovodstva ("Službeni list RBiH", broj 2/92), iza člana 152. dodaje se novo poglavlje VIII i novi čl: 152a, 152b, 152c, 152d, 152e, 152f, 152g, koji glase:

"VIII POSEBNE ODREDBE ZA VRIJEME RATNOG STANJA

Član 152a.

Služba je dužna obavljati osnovne poslove iz svog djelokruga i na privremeno zaposjednutoj teritoriji u skladu sa odlukama Vlade Republike Bosne i Hercegovine, planovima za odbranu privremeno zaposjednute teritorije i novonastalim uvjetima rada.

Član 152b.

Platni promet u zemlji Služba obavlja i u stranim sredstvima plaćanja za pravna lica i njihove dijelove za vrijeme ratnog stanja do visine raspoloživih deviznih sredstava na računima tih lica kod nadležne jedinice Službe društvenog knjigovodstva.

Član 152c.

Obavljanje poslova platnog prometa u stranim sredstvima plaćanja vrši preko posebnih računa pravnih lica i njihovih dijelova koje Služba otvara na njihov zahtjev.

Član 152d.

Stanje deviznih sredstava na računima kod Službe dnevno se uključuje na poseban račun Narodne banke Bosne i Hercegovine.

Služba desetodnevno obavještava Narodnu banku Bosne i Hercegovine o stanju efektivnog deviznog novca u njenim trezorima.

Strani efektivni novac u trezorima Službe predstavlja dio deviznih rezervi Republike.

Član 152e.

Za obavljanje platnog prometa u zemlji sa stranim sredstvima plaćanja Narodna banka Bosne i Hercegovine i Služba izdat će uputstvo o načinu i postupku njegovog izvršavanja.

Član 152f.

Radom Službe upravlja i rukovodi generalni direktor. Generalni direktor Službe propisuje ratnu organizaciju i način rada, te donosi obavezna uputstva za rad organizacionih jedinica Službe.

Generalni direktor Službe je naredbodavac za korišćenje sredstava Službe.

Član 152g.

Tarifu usluge i naknada koje Služba naplaćuje za vrijeme ratnog stanja utvrđuje generalni direktor Službe uz prethodno pribavljeno mišljenje Ministarstva finansija.

Član 2.

Danom stupanja na snagu ove uredbe prestaje da važi Uredba sa zakonskom snagom o primjeni Uredbe sa zakonskom snagom o Službi društvenog knjigovodstva za vrijeme ratnog stanja ili u slučaju neposredne ratne opasnosti ("Službeni list RBiH", broj 9/92).

Član 3.

Ova uredba stupa na snagu danom objavljivanja u "Službenom listu RBiH".

PR broj 1637/94.
5. maja 1994. godine
Sarajevo

Predsjednik
Predsjedništva RBiH,
Alija Izetbegović, s. r.

193

Na osnovu Amandmana LI tačka 5. stav 3. na Ustav Republike Bosne i Hercegovine, Predsjedništvo Republike Bosne i Hercegovine, na prijedlog Vlade Republike Bosne i Hercegovine, donosi

UREDBU SA ZAKONSKOM SNAGOM O BANKAMA

I - OSNOVNE ODREDBE

Član 1.

Za obavljanje depozitnih, kreditnih i drugih bankarskih poslova može se osnovati banka.

Banka se može baviti poslovima u zemlji i sa inozemstvom, pod uvjetima propisanim ovom uredbom i drugim propisima.

Član 2.

Banka je pravno lice sa sjedištem na teritoriji Republike Bosne i Hercegovine (u daljem tekstu: Republika), a osniva se pod uvjetima propisanim ovom uredbom.

Član 3.

Banka samostalno i prema uvjetima tržišta obavlja poslove radi ostvarivanja dobiti, a na načelima likvidnosti, solventnosti i rentabilnosti.

Banka je nosilac prava i obaveza u pravnom prometu u odnosu na sredstva kojim raspolaže i koja koristi u skladu sa prirodom i namjenama finansijskih sredstava.

Član 4.

U skladu sa odredbama ove uredbe može se osnovati druga finansijska organizacija koja u predmetu svog poslovanja obavlja i depozitne poslove (u daljem tekstu: depozitna organizacija).

Na depozitnu organizaciju primjenjuju se odredbe ove uredbe, ako ovom uredbom nije drugačije propisano.

II - BANKA

1. Osnivanje i poslovanje banke

1.1. Osnivanje banke

Član 5.

Banku mogu osnovati domaća i strana pravna i fizička lica. Banka se osniva kao dioničarsko društvo sa najmanje deset dioničara ili kao društvo sa ograničenom odgovornošću sa najviše devet ulagača (u daljem tekstu: osnivači).

Banka se osniva ugovorom o osnivanju i poslovanju banke, a kada banku osniva jedno lice, odlukom o osnivanju i poslovanju banke.

Strana pravna i fizička lica mogu samostalno ili zajedno sa domaćim pravnim i fizičkim licima osnivati banku pod uvjetom reciprociteta.

Strana banka može formirati filijalu, poslovnu jedinicu i predstavništvo (u daljem tekstu: organizacioni dijelovi strane banke) pod uvjetom reciprociteta.

Član 6.

Ugovorom iz člana 5. stav 3. ovom uredbom određuje se iznos novčanih sredstava koji je svaki osnivač dužan da uloži u kapital banke, s tim da ukupan iznos novčanog uloga ne može biti manji od 1,5 miliona SAD dolara izražen u dinarima.

Iznos novčanih sredstava iz stava 1. ovog člana domaća pravna i fizička lica, uplaćuju u sredstvima plaćanja koja glase na dinar ili u stranim sredstvima plaćanja, a strana pravna i fizička lica u stranim sredstvima plaćanja.

Član 7.

Uvjerjenje o postojanju reciprociteta iz člana 5., st. 3. i 4. ovog zakona izdaje Ministarstvo finansija.

Ministarstvo finansija utvrđuje da li je i pod kojim uvjetima domaćem licu dozvoljeno osnivanje banke ili njenih organizacionih dijelova u državi stranog lica.

Član 8.

Minimalni iznos novčanih sredstava i druge uvjete za otvaranje organizacionih dijelova strane banke propisuje Narodna banka Bosne i Hercegovine (u daljem tekstu: Narodna banka).

Na organizacione dijelove strane banke primjenjuju se odredbe ove uredbe i drugih propisa koji se odnose na banke.

Član 9.

Osnivači banke dužni su Narodnoj banci podnijeti zahtjev za izdavanje dozvole za osnivanje i poslovanje banke (u daljem tekstu: dozvola) sa slijedećom dokumentacijom:

- 1) ugovor o osnivanju i poslovanju banke, potpisan od svih dioničara;
- 2) nacrt statuta banke;
- 3) nacrt akta poslovne politike;
- 4) elaborat o ekonomsko-finansijskoj opravdanosti osnivanja banke koji sadrži naročito:
 - a) ciljeve osnivanja banke;

b) detaljan opis poslova koje će banka obavljati i projekciju obavljanja tih poslova najmanje za dvije godine unaprijed, naročito u pogledu održavanja likvidnosti, solventnosti i rentabilnosti poslovanja;

c) podatke o visini kapitala banke, te visini osnivačkog uloga svakog osnivača;

d) informacije o međusobnoj kapitalskoj, upravljačkoj i drugoj povezanosti osnivača i o njihovom finansijskom stanju;

e) podatke na osnovu kojih će se moći utvrditi da će banka imovinski, kadrovski, tehnički, informatički i organizaciono biti sposobna obavljati poslove predviđene ugovorom o osnivanju i poslovanju banke;

5) uvjerenje o postojanju reciprociteta iz člana 7. ove uredbe, ako u osnivanju banke učestvuje i strano lice;

6) imena i podatke za direktora i najmanje dva rukovodeća lica koja su predviđena i osposobljena da rukovode bankom.

Član 10.

Strana banka dužna je, za otvaranje organizacionog dijela, Narodnoj banci podnijeti zahtjev za izdavanje dozvole sa slijedećom dokumentacijom:

1) podatke o nazivu, pravnom statusu i sjedištu strane banke;

2) statut banke;

3) podatke o poslovanju banke;

4) godišnji izvještaj o poslovanju banke za protekle dvije godine;

5) uvjerenje o postojanju reciprociteta iz člana 7. ove uredbe;

6) opis poslova koje će organizacioni dio banke obavljati;

7) podatke o visini novčanih i drugih sredstava sa kojima će raspolagati organizacioni dio strane banke;

8) imena i podatke za direktora i najmanje dva rukovodeća lica koja su predviđena i osposobljena da rukovode organizacionim dijelom banke.

Član 11.

Na osnovu zahtjeva i dokumentacije iz čl. 9. i 10. ove uredbe Narodna banka, u roku od 30 dana utvrđuje da li su ispunjeni uvjeti, te donosi rješenje o izdavanju dozvole ili rješenje kojim se odbija zahtjev za izdavanje dozvole.

Dozvolom iz stava 1. ovog člana može se dozvoliti obavljanje svih bankarskih poslova ili samo pojedinih bankarskih poslova iz člana 22. ove uredbe.

Narodna banka donosi rješenje o izdavanju dozvole na osnovu odredaba ovog zakona i bližih uvjeta i kriterijuma koje ona propisuje.

Rješenje iz stava 1. ovog člana je konačno u upravnom postupku i protiv njega se može voditi upravni spor.

Član 12.

Ugovor o osnivanju i poslovanju banke sadrži, naročito:

1) naziv, imena i adrese osnivača;

2) naziv i sjedište banke,

3) vrsta banke i ciljevi zbog kojih se banka osniva,

4) depozitni, kreditni i drugi bankarski poslovi koje banka obavlja (predmet poslovanja),

5) ukupan iznos kapitala banke koji osiguravaju osnivači;

6) pojedinačan ulog svakog osnivača u kapital banke, iskazan u novčanom iznosu;

7) rok do koga su osnivači banke dužni uplatiti novčana sredstva u kapital i osigurati druge uvjete za osnivanje i poslovanje banke;

8) obaveze i prava osnivača, način upravljanja, nadležnost organa upravljanja i način odlučivanja;

9) kriterijumi za raspodjelu dobiti, način snošenja rizika i pokrića gubitka;

10) odredbe za održavanje likvidnosti, solventnosti i rentabilnosti poslovanja banke;

11) uvjeti i način povećanja kapitala banke i način prijenosa vrijednosnih papira koje dioničari dobijaju za sredstva trajno uložena u banku;

12) uvjeti za prestanak banke;

13) odnosi u slučaju pripajanja i spajanja banke;

14) uvjeti i način prestanka prava i obaveza osnivača banke

15) imena lica ovlaštenih da poduzimaju radnje i daju izvje volje potrebne za osnivanje banke.

Član 13.

Skupština banke ili drugi odgovarajući organ proglašava osnivanje banke, usvaja izvještaj o osnivanju banke, donosi statut banke, bira upravni i nadzorni odbor, imenuje vršioca dužnosti direktora banke, utvrđuje akta o poslovnoj politici banke i donosi druge odluke prijeko potrebne za početak rada banke.

Član 14.

Statutom banke utvrđuje se:

- 1) naziv i sjedište banke;
- 2) način povećanja kapitala;
- 3) osnovne odredbe o dionicama (način emisije, vrste uplata, prioriteta i druga prava, denominacija, spajanje, zamjena, odnos dionica na ime i na donosioca, prijenos i sl.);
- 4) odredbe o pravima osnivača;
- 5) organizacija i način poslovanja banke;
- 6) nadležnost i sastav skupštine banke ili drugog odgovarajućeg organa, upravnog i nadzornog odbora banke i njihov način odlučivanja;
- 7) obaveze i prava direktora i zaposlenih koji obavljaju poslove i zadatke sa posebnim ovlaštenjima u banci;
- 8) način davanja ovlaštenja za potpisivanje i zastupanje banke;
- 9) način donošenja općih i pojedinačnih akata banke;
- 10) način obavljanja unutrašnje kontrole u radu banke;
- 11) druga pitanja u vezi sa poslovanjem banke.

Član 15.

Banka može formirati organizacione dijelove banke (filijala, poslovna jedinica i predstavništvo), čija se nadležnost i predmet poslovanja utvrđuje statutom banke.

Statutom banke može se prenijeti u nadležnost organizacionim dijelovima banke da u pravnom prometu sa trećim licima zaključuju ugovore i obavljaju druge pravne poslove.

Novčani promet za poslove iz stava 1. ovog člana, banka obavlja preko računa banke kod organizacije ovlaštene za obavljanje platnog prometa.

Organizacioni dijelovi banke, u okviru svog predmeta poslovanja i prenesenih ovlaštenja, mogu obavljati novčani promet i preko posebnog računa kod organizacije ovlaštene za obavljanje platnog prometa.

Računi iz stava 4. ovog člana sastavni su dio žiro-računa banke.

Član 16.

Banka stiče svojstvo pravnog lica upisom u sudski registar.

Banka je dužna da podnese prijavu za upis u sudski registar u roku 30 dana od dana dobijanja dozvole za osnivanje i poslovanje banke.

Uz prijavu za upis u sudski registar podnose se i:

- 1) ugovor o osnivanju i poslovanju banke potpisan od osnivača i vršioca dužnosti direktora;
- 2) statut banke potpisan od predsjednika skupštine ili predsjednika banke;
- 3) dokaz da banka ispunjava uvjet za osnivanje iz člana 8. ove uredbe;
- 4) dozvola Narodne banke;
- 5) dokaz da su uplaćena dinarska sredstva na privremeni račun kod organizacije ovlaštene za obavljanje platnog prometa, a za strana sredstva plaćanja potvrda da su uplaćena na poseban račun Narodne banke; i
- 6) druge isprave u skladu sa propisima o upisu u sudski registar.

U sudski registar upisuju se i dijelovi banke, u skladu sa propisima o upisu u sudski registar.

Član 17.

Banka se može spojiti sa drugom bankom ili pripojiti drugoj banci na osnovu dozvole Narodne banke.

Uvjet je za izdavanje dozvole iz stava 1. ovog člana, te način, postupak i rokove za usklađivanje poslovanja nakon obavljanja statusne promjene sa odredbama ove uredbe, propisuje Narodna banka.

Statusne promjene banke obavljaju se u skladu sa odredbama ove uredbe koje se primjenjuju kod osnivanja banke.

1.2. Poslovanje banke

Član 18.

Banka je dužna da otpočne stvarno poslovanje u roku od 60 dana od dana upisa u sudski registar.

Ukoliko banka ne otpočne stvarno poslovanje u roku iz stava 1. ovog člana Narodna banka donijet će rješenje o oduzimanju dozvole iz člana 11. ove uredbe.

Član 19.

Banka posluje sredstvima uloženim u vlastiti kapital banke, sredstvima depozita, sredstvima uzetih kredita i drugim sredstvima pribavljenim na tržištu novca i kapitala u zemlji i inozemstvu.

Član 20.

Obim i strukturu svojih plasmana i odgovarajućih vanbilansnih stavki, banka je dužna da održava u zavisnosti od visine vlastitog kapitala, da se pridržava odredbi o velikom i najvećem mogućem kreditu jednom zajmoprimcu i ukupnom iznosu velikih i najvećih mogućih kredita, kao i drugih propisanih pravila poslovanja.

Velikom kreditom, u smislu ove uredbe, smatra se ukupan iznos kredita i drugih potraživanja i garancija koji su dati jednom zajmoprimcu, koji prelazi 20% vlastitog kapitala.

Najvećim mogućim kreditom jednom zajmoprimcu, u smislu ove uredbe, smatra se kredit iz stava 2. ovog člana koji iznosi 40% vlastitog kapitala.

Ukupni iznos velikih i najvećih mogućih kredita ne može preći 80% vlastitog kapitala.

Bliže uvjete za primjenu odredaba ovog člana propisuje Narodna banka.

Član 21.

Banka može posloovati u svoje ime i za svoj račun, u svoje ime a za račun drugih i u ime i za račun drugih lica.

Član 22.

Banka se može baviti depozitnim, kreditnim i drugim bankarskim poslovima, u skladu sa ovim zakonom.

Pod poslovima iz stava 1. ovog člana smatraju se naročito:

- 1) primanje svih vrsta novčanih depozita;
- 2) uzimanje i davanje kredita;
- 3) devizni i devizno valutni poslovi;
- 4) kupovina i prodaja vrijednosnih papira;
- 5) izdavanje vrijednosnih papira i novčanih kartica;
- 6) izdavanje garancija, avala i drugih oblika jamstva;
- 7) obavljanje određenih poslova platnog prometa;
- 8) osiguranje i reosiguranje depozita i plasmana i drugih bankarskih poslova;
- 9) čuvanje i upravljanje sredstvima i vrijednosnim papirima.

Devizno valutne poslove, platni promet sa inozemstvom i kreditno-garancijske poslove sa inozemstvom banka obavlja na osnovu posebnog odobrenja Narodne banke, pod uvjetima koje propisuje Narodna banka.

Narodna banka može propisati i druge poslove kao bankarske poslove.

Član 23.

Radi uzimanja i davanja kredita i obavljanja drugih bankarskih poslova u finansiranju većih poslova i zajedničkog nastupa, dvije ili više banaka mogu osnovati bankarski konzorcij.

Banke mogu osnovati bankarski konzorcij zajedno sa stranim bankama i drugim finansijskim organizacijama.

Član 24.

Banka prima sve vrste depozita u domaćim i stranim sredstvima plaćanja kao depozite po videnju ili oročene depozite sa ili bez otkaznog roka, bez ili sa posebnom namjenom, od

domaćih i stranih pravnih i fizičkih lica, kao i nenovčane depozite, a u skladu sa ovom uredbom, drugim propisima i ugovorom o osnivanju i poslovanju banke.

Ugovorom o depozitu iz stava 1. ovog člana bliže se određuju uvjeti deponovanja i povlačenja sredstava.

Član 25.

Banka prima štedne uloge i druge depozite građana u dinarima i stranim sredstvima plaćanja.

Podaci o štednim ulozima i drugim depozitima građana su poslovna tajna banke i mogu se saopćavati samo na pismeni zahtjev suda, ako je prema vlasniku štednog uloga ili drugog depozita pokrenut sudski postupak.

Član 26.

Aktima poslovne politike banka utvrđuje način i uvjete prijema i povlačenja dinarskih i deviznih štednih uloga i drugih depozita.

Član 27.

Banka koja se bavi poslovima štednje dužna je da štedne uloge pojedinog štediše osigura kod institucije ovlaštene za osiguranje štednih uloga do ukupnog iznosa kojeg propiše Narodna banka.

Član 28.

Banka može voditi žiro-račune, tekuće i druge račune građana i po tim računima obavljati platni promet za račun vlasnika takvih računa, u skladu sa ovim zakonom i drugim propisima.

Član 29.

Podaci o poslovanju građana preko žiro-računa mogu se saopćavati samo na pismeni zahtjev suda ili finansijskog organa društveno-političke zajednice.

Podaci o poslovanju građana preko tekućeg računa mogu se saopćavati samo u skladu sa odredbom člana 25. ove uredbe.

Član 30.

Banka može uzimati kredite od domaćih i stranih lica i davati kredite tim licima, u skladu sa zakonom i aktima poslovne politike banke.

Kredit stranom licu može se davati pod uvjetima utvrđenim zakonom.

Član 31.

Banka može primati na čuvanje vrijednosne papire, predmete od zlata i drugih plemenitih metala, lomljeno zlato, nakit i druge vrijednosti.

Član 32.

Banka može odobravati kredite osnivačima banke koji imaju preko 5% glasova u upravljanju bankom samo na osnovu odluke organa koji odobrava kredite, uz obaveznu prethodnu saglasnost upravnog odbora banke.

Banka može odobravati kredite direktoru banke i drugim licima sa posebnim ovlaštenjima, članovima upravnog odbora, nadzornog odbora, te drugih organa banke po postupku iz stava 1. ovog člana.

U odluci o odobrenju kredita iz st. 1. i 2. ovog člana mora biti naznačena visina kredita, kamatna stopa, način otplate kredita i sredstva osiguranja naplate kredita.

U slučaju da se pri odobravanju kredita iz st. 1. i 2. ovog člana ne poštuje propisani postupak, kredit odmah dospijeva za naplatu.

1.2.1. Principi bankarskog poslovanja

Član 33.

Banka posluje na tržištu samostalno i dužna je da održava likvidnost, solventnost i rentabilnost svog poslovanja.

Član 34.

Banka je likvidna kada ima dovoljno novčanih sredstava za izmirenje svojih dospjelih obaveza.

Član 35.

Banka je solventna kada svojom ukupnom realnom imovinom može izmiriti svoje ukupne obaveze.

Član 36.

Banka je rentabilna kada svojim poslovanjem ostvaruje prihode dovoljne za pokriće rashoda i ostvaruje dobit.

Član 37.

Osnivači banke snose rizik iz poslovanja banke do visine uloga.

Član 38.

Nelikvidna banka ne može odobravati kredite i druge plaćmane, davati garancije i druge oblike jemstva, niti plaćati sa svoga žiro-računa.

Deponenti banke ne mogu raspolagati sredstvima koja imaju kod nelikvidne banke.

1.2.2. Utvrđivanje dobiti i pokriće gubitka banke

Član 39.

Banka utvrđuje i raspoređuje prihode u skladu sa zakonom. Iz ostvarenog prihoda banka pokriva svoje rashode u skladu sa uredbom.

Član 40.

Dio prihoda iz poslovanja banke po godišnjem obračunu, koji preostane po podmirenju rashoda, banka iskazuje kao ostvarenu dobit.

Dobit iz stava 1. ovog člana, po odbitku poreskih obaveza i u skladu sa odlukom nadležnog organa banke, raspoređuje se po redoslijedu na:

- 1) dio za namirenje rezervi i dio kapitala osnivača, ako je gubitak u prethodnom periodu namiren iz ovih izvora;
- 2) dio za povećanje rezervi banke i
- 3) dio koji se raspoređuje na osnivače, dio za druge vrste kapitala i dio za povećanje kapitala osnivača.

Član 41.

Ako prihod banke, po godišnjem obračunu, nije dovoljan za pokriće njenih rashoda, banka iskazuje gubitak.

Član 42.

Za visinu gubitka iz poslovanja banke smanjuje se ukupni kapital, u skladu sa ovom uredbom i na način i u obimu koji je utvrđen statutom banke.

1.2.3. Kapital banke

Član 43.

Kapital banke sastoji se od dioničkog kapitala odnosno kapitala ulagača (u daljem tekstu: dionički kapital) i rezervi banke.

Banka može imati i druge vrste kapitala.

Kapital iz st. 1. i 2. ovog člana predstavlja ukupni kapital banke.

Član 44.

Dionički kapital banke formira se iz uloženi novčanih sredstava osnivača banke.

Osnivači mogu ulagati i druga sredstva u dionički kapital banke.

Bliže uvjete ulaganja u dionički kapital iz stava 2. ovog člana propisuje Narodna banka.

Za uložena sredstva u dionički kapital izdaje se dionica, odnosno potvrda o ulogu koja glasi na ime ili na donosioca.

Član 45.

Banka koristi dionički kapital za obavljanje bankarskih poslova, za ulaganje u drugu banku ili drugo pravno lice, kao i za pokriće rizika i gubitka nakon iskorišćenja rezervi i drugih vrsta kapitala.

Dionički kapital banka može koristiti i za druge namjene u skladu sa aktima poslovne politike banke.

Član 46.

Radi pokrića rizika i gubitaka iz poslovanja banke formiraju se rezerve banke.

Rezerve banke formiraju se iz uplata osnivača i dijela dobiti kojeg banka ostvari svojim poslovanjem.

Član 47.

Rezerve banke se koriste za osiguranje od potencijalnih gubitaka koji proističu iz rizičnih plasmana i odgovarajućih vanbilansnih stavki određenog stepena naplativosti, za pokriće gubitaka koji proizilaze iz poslovanja banke i drugih rizika. Narodna banka propisuje način i uvjete formiranja i visinu rezervi iz stava 1. ovog člana.

1.2.4. Revizija poslovanja banke

Član 48.

Banka je obavezna da organizaciji ovlaštenoj za obavljanje poslova revizije, podnese godišnji obračun na ekonomsko finansijsku reviziju i izvještaj o izvršenoj reviziji dostavi Narodnoj banci.

2. Organizacija i upravljanje bankom

Član 49.

Banka samostalno utvrđuje način i oblik unutrašnje organizacije.

Član 50.

Bankom upravljaju dioničari, zavisno od visine uloženi sredstava u dionički kapital, u skladu sa ugovorom o osnivanju i poslovanju banke i statutom banke.

Jedan dioničar ne može imati više od 15% ukupnog broja glasova u skupštini banke.

Izuzetno, pojedini dioničar banke može steći više od petnaest posto ukupnog broja glasova u skupštini banke uz odluku skupštine banke i prethodnu saglasnost Narodne banke.

Ugovorom o osnivanju i poslovanju banke i statutom banke mogu se ograničiti određena prava upravljanja dioničaru koji ne izvršava obaveze prema banci, za vrijeme dok te obaveze ne izvrši.

Član 51.

Najviši organ upravljanja bankom je skupština banke.

Skupštinu banke čine dioničari koje mogu zastupati opuno-moćena lica.

Broj članova skupštine i način njihovog izbora, funkcioniranje skupštine i način njenog odlučivanja utvrđuje se ugovorom o osnivanju i poslovanju banke i statutom banke.

Član 52.

Skupština banke naročito:

- 1) proglašava banku osnovanom;
- 2) utvrđuje strategiju razvoj banke;
- 3) usvaja statut banke;
- 4) razmatra i usvaja izvještaj o radu banke;
- 5) usvaja godišnji obračun banke i odlučuje o upotrebi i raspodjeli ostvarene dobiti ili pokriću gubitka;
- 6) odlučuje o povećanju ukupnog kapitala banke;
- 7) imenuje i razrješava članove upravnog i nadzornog odbora i razmatra i usvaja izvještaje upravnog i nadzornog odbora i
- 8) odlučuje o statusnim promjenama i prestanku rada banke.

Član 53.

Banka ima upravni odbor koji ima predsjednika i najmanje četiri člana.

Najmanje jedna polovina članova upravnog odbora moraju biti dioničari banke.

Predsjedniku i članovima upravnog odbora, kada su dioničari, dividenda se isplaćuje prioriteto nakon isteka roka od tri godine.

Lica iz stava 3. ovog člana dok su u upravnom odboru ne mogu prenositi uloge na treća lica.

Ugovorom o osnivanju i poslovanju banke može se predvidjeti da nadležnosti skupštine banke obavlja upravni odbor banke.

Direktor i zaposleni u banci kao i lice zaposleno u državnom organu, osim kada se društveno-politička zajednica pojavljuje kao dioničar banke, ne mogu biti članovi upravnog odbora banke.

Predsjednik upravnog odbora banke može biti predsjednik banke, ako je to statutom predviđeno.

Član 54.

Upravni odbor banke vrši naročito slijedeće poslove:

- 1) utvrđuje poslovnu politiku banke;
- 2) donosi planove, programe rada i opće akte banke, osim akata koje donosi skupština banke;
- 3) priprema prijedloge za skupštinu banke i izvršava njene odluke i akta;
- 4) razmatra i usvaja izvještaje o poslovanju banke u toku godine;
- 5) imenuje i razrješava direktora banke i daje uputstva i smjernice za njegov rad;
- 6) donosi odluke o većim poslovnim poduhvatima saglasno statutu banke;
- 7) podnosi skupštini banke i nadzornom odboru izvještaj o poslovanju banke;
- 8) saziva sjednice skupštine banke i
- 9) vrši i druge poslove predviđene statutom banke, kao i poslove koji nisu u nadležnosti skupštine ili nadzornog odbora.

Član 55.

Nadzorni odbor banke je organ nadzora, koji ima predsjednika i najmanje četiri člana.

Nadzorni odbor banke prati i kontrolira poslovanje banke, upravnog odbora i direktora banke i o tome podnosi izvještaje i prijedloge skupštini banke.

Za predsjednika i člana nadzornog odbora ne mogu biti imenovani predsjednik i članovi upravnog odbora ili direktor te ili bilo koje druge banke, lice zaposleno u državnom organu, osim kada se društveno-politička zajednica pojavljuje kao dioničar banke, lice koje je član javnog trgovačkog društva ili komanditor.

U slučaju nesavjesnog rada ili prekršaja svoje dužnosti od predsjednika i članova nadzornog odbora banka može tražiti naknadu štete.

Član 56.

Banka ima direktora banke.

Direktor banke se imenuje u skladu sa statutom banke.

Direktor može biti dioničar banke. Za vrijeme obavljanja dužnosti, direktor ne može prenositi uloge na treća lica. Dividenda se isplaćuje direktoru prioriteto nakon isteka roka od tri godine.

Za imenovanje direktora banke potrebna je prethodna saglasnost Narodne banke.

Ugovorom o osnivanju i poslovanju banke može se predvidjeti da banka ima predsjednika banke, čije se obaveze i prava uređuju statutom banke.

Član 57.

Direktor banke obavlja naročito slijedeće poslove:

- 1) rukovodi poslovanjem banke i organizira njen rad;
- 2) predstavlja i zastupa banku;
- 3) izvršava odluke skupštine i upravnog odbora banke, odnosno brine se za njihovo provođenje;
- 4) pokreće inicijativu i daje prijedloge za unapređenje poslovanja banke i
- 5) imenuje i razrješava radnike sa posebnim ovlaštenjima.

Član 58.

Direktor banke odgovoran je za zakonitost rada banke.

Član 59.

Direktor banke odnosno lice sa posebnim ovlaštenjima, za vrijeme obavljanja funkcije, ne može kupovati dionice i uloge povjerilaca i dužnika banke.

Direktor banke i lica sa posebnim ovlaštenjima najmanje šest mjeseci poslije prestanka radnog odnosa u toj banci, ne mogu biti osnivači druge banke.

Ako lica iz st. 1. i 2. ovog člana postupe suprotno ovim odredbama, banka ima pravo da pred nadležnim sudom zahtijeva brisanje iz sudskog registra drugog pravnog lica.

Član 60.

Ukoliko je banka osnovana kao društvo sa ograničenom odgovornošću, odlukom odnosno ugovorom o osnivanju i poslovanju banke i statutom banke, uređuje se upravljanje bankom shodno odredbama člana 50. st. 1. i 4. i čl. 51, 52, 53, 54. i 55. ove uredbe.

3. Obavješćavanje

Član 61.

Banka je dužna obavješćavati Narodnu banku o:

- 1) izvršenoj registraciji i početku rada banke uz prilaganje odgovarajuće dokumentacije;
- 2) namjeravanim statusnim promjenama banke;
- 3) namjeri promjene statuta banke;
- 4) osnivačkim ulozima u nebankarske organizacije;
- 5) namjeri osnivanja banke, filijale, poslovne jedinice ili predstavništva u inozemstvu;
- 6) namjeri odobrenja i odobrenju velikog, odnosno najvećeg mogućeg kredita;
- 7) osnivaču banke koji je kupovinom dionica stekao više od 10% kapitala;
- 8) osnivanju bankarskog konzorcijuma i
- 9) drugim informacijama i podacima koje zatraži Narodna banka.

Banka je dužna javno objavljivati uvjete i rezultate poslovanja, statusne promjene i ostale elemente bitne za informiranje javnosti.

III - DEPOZITNE ORGANIZACIJE

Član 62.

Depozitna organizacija se može osnovati kao: štedionica, stambena zadruga, druga štedno-kreditna organizacija ili druga finansijska organizacija koja se bavi depozitnim poslovima.

Član 63.

Iznos kapitala i druge uvjete za osnivanje i poslovanje depozitne organizacije propisuje Narodna banka.

Član 64.

Odredbe ove uredbe koje se odnose na banke shodno se primjenjuju i na depozitne organizacije.

IV - OSTALE ODREDBE

Član 65.

Preduzeća i druga pravna lica koja nisu osnovana u skladu sa ovom uredbom ne mogu obavljati depozitne poslove.

Član 66.

U sudski registar ne može se upisati naziv koji u sebi sadrži naziv: "banka", "finansijska organizacija", "depozitna organizacija" ili "Republika Bosna i Hercegovina", odnosno izvedenicu ili skraćenicu iz ovih naziva, ako pravnom licu nije izdata dozvola u skladu sa ovom uredbom.

V - POSEBNE ODREDBE ZA VRIJEME RATNOG STANJA ILI U SLUČAJU NEPOSREDNE RATNE OPASNOSTI

Član 67.

U uvjetima kada se skupština odnosno upravni odbor ili nadzorni odbor ne mogu sastati i obavljati poslove iz svoje nadležnosti, njihove poslove obavlja direktor.

Kada se upravni odbor ne može sastati i obavljati imenovanje odnosno razrješenje direktora, direktora imenuje i razrješava Narodna banka.

Po prestanku uvjeta iz stava 1. ovog člana, direktor donešene odluke podnosi odgovarajućem organu banke na potvrdu.

Član 68.

Direktor je obavezan obavješćavati Narodnu banku o cjelokupnom poslovanju banke najmanje jednom mjesečno i blagovremeno dostavljati periodični i godišnji obračun banke.

Član 69.

Banka je obavezna usmjeravati svoj kreditni i drugi bankarski potencijal prvenstveno za potrebe odbrane, proizvodnje u

poljoprivredi i prehrambenoj industriji, snabdijevanja stanovništva i druge potrebe utvrđene ekonomskom politikom Vlade Republike Bosne i Hercegovine.

VI - KAZNE ODREDBE

Član 70.

Novčanom kaznom od 1.000 do 8.000 DEM u dinarskoj protivrijednosti po srednjem kursu koji utvrđuje i objavljuje Narodna banka, kaznit će se za privredni prijestup banke i depozitna organizacija ako:

- 1) svoje poslovanje ne održava u okviru uvjeta propisanih članom 20. ove uredbe;
- 2) ne održava likvidnost i solventnost u svom poslovanju koje traju pet radnih dana neprekidno, odnosno sa prekidima 10 radnih dana u toku mjeseca;
- 3) ne uskladi svoje poslovanje u roku iz člana 72. ove uredbe;
- 4) ne postupi u skladu sa članom 69. ove uredbe.

Novčanom kaznom od 20 do 400 DEM u dinarskoj protivrijednosti po srednjem kursu koji određuje i objavljuje Narodna banka kaznit će se za privredni prijestup iz stava 1. ovog člana direktor i drugi radnik sa posebnim ovlaštenjem u banci ili depozitnoj organizaciji.

Direktor i drugi radnici sa posebnim ovlaštenjem u banci ili depozitnoj organizaciji koji su osuđeni za privredni prijestup iz stava 2. ovog člana ne mogu obavljati rukovodeće poslove u banci ili depozitnoj organizaciji za vrijeme od dvije godine od dana pravosnažnosti presude.

Član 71.

Novčanom kaznom od 20 do 200 DEM u dinarskoj protivrijednosti po srednjem kursu koji određuje i objavljuje Narodna banka, kaznit će se za prekršaj direktor banke koji postupa suprotno članu 68. ove uredbe.

VII - PRIJELAZNE I ZAVRŠNE ODREDBE

Član 72.

Dioničari iz drugih republika bivše SFRJ, druge republike iz bivše SFRJ i bivša SFRJ, koji su uložili sredstva u skladu sa Zakonom o bankama i drugim finansijskim organizacijama ("Službeni list SFRJ", br. 10/89, 40/89, 87/89, 18/89, 72/90 i 79/90) ne mogu po osnovu dionica upravljati bankom niti ostvariti druga prava, dok se ne reguliraju odnosi naslijeđivanja i prijenosa kapitala između Republike Bosne i Hercegovine i drugih republika iz bivše SFRJ.

Član 73.

Banke i druge finansijske organizacije su dužne uskladiti svoje poslovanje sa odredbama člana 6. ove uredbe u roku od dvije godine po prestanku ratnog stanja ili neposredne ratne opasnosti odnosno sa odredbama člana 20. ove uredbe u roku od tri godine po prestanku ratnog stanja ili neposredne ratne opasnosti.

Ukoliko banka ili druga finansijska organizacija ne uskladi svoje poslovanje u roku iz stava 1. ovog člana, Narodna banka oduzima dozvolu i pokreće postupak za brisanje banke iz sudskog registra.

Propise o uskladjivanju poslovanja banke i druge depozitne organizacije sa odredbama ove uredbe propisuje Narodna banka.

Član 74.

Danom stupanja na snagu ove uredbe prestaje da važi Zakon o bankama i drugim finansijskim organizacijama ("Službeni list RBiH", broj 2/92).

Član 75.

Ova uredba stupa na snagu danom objavljivanja u "Službenom listu RBiH".

PR broj 1638/94
5. maja 1994. godine
Sarajevo

Predsjednik
Predsjedništva RBiH,
Alija Izetbegović, s. r.

194

Na osnovu Amandmana LI tačka 5. stav 3. na Ustav Republike Bosne i Hercegovine, Predsjedništvo Republike Bosne i Hercegovine, na prijedlog Vlade Republike Bosne i Hercegovine, donosi

UREDBU SA ZAKONSKOM SNAGOM O SANACIJI, STEČAJU I LIKVIDACIJI BANAKA

I - OSNOVNE ODREDBE

Član 1.

Ovom uredbom ureduju se uvjeti i postupak sanacije, stečaja i likvidacije banaka.

Član 2.

Postupak sanacije može se provesti nad bankom čiji su potencijalni gubici u rizičnim plasmanima i odgovarajućim vanbilansnim stavkama veći od 50% ukupnog kapitala banke, ako Narodna banka Bosne i Hercegovine (u daljem tekstu: Narodna banka), ocijeni da je ovaj postupak moguć i ekonomski opravdan.

Postupak sanacije po ovom zakonu može se provesti i nad bankom čiji su potencijalni gubici manji od 50% ukupnog kapitala, ako takav zahtjev podnese banka i ako Narodna banka taj zahtjev ocijeni ekonomski opravdanim.

Klasifikacija aktive i odgovarajućih vanbilansnih stavki banke sa stanovišta njihove naplativosti i visine potencijalnih gubitaka utvrđuju se na način koji propiše Narodna banka.

Član 3.

Postupak stečaja provodi se nad bankom kada Narodna banka ocijeni da sanacija banke nije moguća i ekonomski opravdana.

Član 4.

Postupak likvidacije provodi se nad bankom čiji su dioničari odnosno ulagači na skupštini banke donijeli odluku o prestanku banke.

Direktor banke je dužan odluku iz stava 1. ovog člana dostaviti Narodnoj banci, najkasnije narednog dana od dana njenog donošenja.

II - UVJETI I POSTUPAK SANACIJE

Član 5.

Sanacija banke podrazumijeva akta i radnje finansijske podrške banci, promjenu strukture vlasništva banke i mjere za osiguranje likvidnosti, solventnosti i rentabilnosti poslovanja, kao i za unapređivanje upravljanja i rukovođenja bankom.

Postupak sanacije može se provoditi kao sistemska sanacija, kao sanacija banaka istog ili sličnog finansijskog stanja i kao sanacija pojedinačnih banaka.

Član 6.

Prijedlog za pokretanje postupka za ocjenu finansijskog stanja banke i razmatranje mogućnosti i ekonomske opravdanosti za njenu sanaciju mogu podnijeti banka, dioničari banke, povjerioci banke, organizacija ovlaštena za obavljanje platnog prometa, Agencija Republike za osiguranje depozita i sanaciju banaka (u daljem tekstu: Agencija) i Narodna banka.

Član 7.

Narodna banka je dužna da u roku od 15 dana od dana prijema prijedloga iz člana 6. ove uredbe donese rješenje o prihvatanju ili odbijanju prijedloga za pokretanje postupka za ocjenu finansijskog stanja banke i ekonomske opravdanosti njene sanacije.

Rješenje iz stava 1. ovog člana Narodna banka dostavlja predlagачu i Agenciji.

Član 8.

Postupak za ocjenu finansijskog stanja banke i ekonomske opravdanosti njene sanacije ne može trajati duže od 90 dana.

Član 9.

Pokrenutim postupkom za ocjenu finansijskog stanja banke i ekonomske opravdanosti sanacije banke, Narodna banka procjenjuje naročito:

- 1) iznos potencijalnih gubitaka banke;
- 2) iznos koji bi u slučaju stečaja banke, Republika Bosna i Hercegovina (u daljem tekstu: Republika) i Narodna banka trebalo da isplate po osnovu garancija za kredite banke uzete u inozemstvu;
- 3) iznos kredita i drugih plasmana Narodne banke;
- 4) iznos sredstava potrebnih za sanaciju banke;
- 5) zainteresovanost i uvjeti pod kojima bi druge banke preuzele banku čija se ekonomska opravdanost sanacije razmatra, kao i uticaj preuzimanja te banke na finansijsko stanje zainteresovanih banaka;

6) zainteresovanost drugih lica za kupovinu dionica banke. Kada na osnovu elemenata iz stava 1. ovog člana i drugih elemenata zaključi da je sanacija banke ekonomski opravdana, Narodna banka donosi rješenje o ekonomskoj opravdanosti sanacije banke sa prijedlogom načina provođenja sanacije banke.

Kada se utvrdi da sanacija banke nije ekonomski opravdana, Narodna banka donosi rješenje o ispunjenju uvjeta za otvaranje postupka stečaja nad bankom.

Rješenje iz stava 2. ovog člana Narodna banka dostavlja Agenciji i o tome obavještava predlagачa pokretanja postupka sanacije iz člana 6. ove uredbe.

Rješenje iz stava 3. ovog člana objavljuje se u "Službenom listu RBiH" i dostavlja banci na koju se odnosi, nadležnom sudu, organizaciji ovlaštenoj za obavljanje platnog prometa i Agenciji.

Član 10.

Odluku o pokretanju postupka i načinu sanacije banke donosi Narodna banka.

Odluka iz stava 1. ovog člana sadrži naročito:

- 1) iznos plasmana i iznos potencijalnih gubitaka banke;
- 2) iznos potencijalnih gubitaka koji se otpisuje na teret ukupnog kapitala banke;
- 3) iznos rizičnih plasmana banke u kojim su sadržani potencijalni gubici koji se rješavaju na drugi propisani način;
- 4) iznos potraživanja koja otpisuju povjerioci banke;
- 5) iznos dodatnog ulaganja u kapital banke;
- 6) naziv i sjedište banke koja preuzima banku u sanaciji i rok do kojeg se mora provesti preuzimanje;
- 7) obaveze kojih se oslobađa banka u sanaciji, odnosno banka koja preuzima banku u sanaciji i rok u kome se vrši ovo oslobađanje;
- 8) način i uvjeti učešća Agencije u sanaciji banke.

Član 11.

Odluku iz člana 10. ove uredbe provodi Agencija.

Član 12.

Sanacija banke provodi se:

- 1) otpisom potencijalnih gubitaka banke na teret vlastitog kapitala banke;
- 2) dodatnim ulaganjem u kapital banke;
- 3) privremenom ili trajnom kupovinom potencijalnih gubitaka banke;
- 4) preuzimanjem potencijalnih gubitaka banke zajedno sa odgovarajućim dijelom pasive;
- 5) djelomičnim ili potpunim otpisom određenih obaveza banke i davanjem povoljnih kredita banci, kao i banci koja je preuzela sanaciju banke;
- 6) uvođenjem kvalitetnih promjena u organizaciji banke, upravljanju i rukovođenju poslovanjem banke i poslovnoj politici banke;
- 7) stvaranjem uvjeta za promjenu strukture vlasništva nad bankom pri čemu treba osigurati zadovoljenje odgovarajućeg boniteta novih dioničara odnosno ulagač banke u sanaciji.

Član 13.

Agencija će obustaviti sve aktivnosti banke u sanaciji koje bi mogle pogoršati njeno finansijsko stanje i odrediti lice koje će neposredno u banci provoditi postupak sanacije.

Član 14.

Donošenjem odluke iz člana 10. ove uredbe suspenduju se funkcije svih organa upravljanja i ovlaštenja direktora i drugih

rukovodećih lica, kao i lica sa posebnim ovlaštenjima i prestaju prava dioničara banke.

Član 15.

Postupak sanacije banke, zavisno od uspjehnosti sanacije, može se završiti donošenjem odluke o sanaciji banke, odnosno uke o preuzimanju banke u sanaciji od strane neke druge banke ili donošenjem rješenja o pokretanju postupka za utvrđivanje uvjeta za otvaranje postupka stečaja nad bankom.

Ako je banka sanirana, Agencija donosi rješenje da je postupak sanacije uspješno završen. Rješenjem se razrješava dužnost lica iz člana 13. ovog zakona.

Ako Agencija u postupku provođenja sanacije banke utvrdi da banku nije moguće sanirati, obavijestit će Narodnu banku o zlozlima nemogućnosti provođenja sanacije i podnijeti prijedlog za pokretanje postupka stečaja nad bankom.

III - UVJETI I POSTUPAK STEČAJA

Član 16.

Prijedlog za donošenje rješenja o pokretanju postupka za utvrđivanje uvjeta za otvaranje postupka stečaja nad bankom Narodnoj banci mogu podnijeti organi upravljanja bankom, povjerioci i dioničari odnosno ulagači banke, organizacija ovlaštena za obavljanje platnog prometa i Agencija.

Član 17.

Guverner Narodne banke dužan je u roku od 15 dana od podnošenja prijedloga iz člana 16. ove uredbe, donijeti rješenje o pokretanju postupka za utvrđivanje uvjeta za otvaranje postupka stečaja ili odbijanju prijedloga.

Guverner Narodne banke može i bez podnošenja prijedloga iz člana 16. ove uredbe donijeti rješenje iz stava 1. ovog člana.

Član 18.

Narodna banka dužna je da u roku od 90 dana od dana donošenja rješenja iz člana 17. ove uredbe, provede postupak utvrđen tim rješenjem i donese rješenje o ispunjenju uvjeta za otvaranje postupka stečaja nad bankom.

Guverner Narodne banke može donijeti rješenje o obustavi postupka za utvrđivanje uvjeta za otvaranje postupka stečaja nad bankom.

Član 19.

Protiv rješenja iz člana 18. stav 1. ove uredbe, banka može Savjetu Narodne banke podnijeti prigovor sa dokazima da za njen stečaj nisu ispunjeni uvjeti, u roku od osam dana od dana dostavljanja rješenja.

Član 20.

Savjet Narodne banke razmatra i ocjenjuje prigovor banke sa dokazima i donosi rješenje o ukidanju ili potvrđivanju rješenja iz člana 18. ove uredbe u roku od 15 dana, od dana podnošenja prigovora.

Član 21.

U rješenju iz člana 18. stav 1. ove uredbe navodi se naziv i sjedište banke i uvjeti poslovanja banke do okončanja postupka stečaja.

Rješenjem iz stava 1. ovog člana može se propisati obustavljanje svake poslovne aktivnosti banke koja bi mogla dalje pogoršati njeno finansijsko stanje i odrediti stručno lice Narodne banke koje će pratiti provođenje rješenja.

Član 22.

Rješenje iz člana 18. stav 1. ove uredbe objavljuje se u "Službenom listu RBiH" i dostavlja banci na koju se odnosi, nadležnom sudu, organizaciji zaduženoj za obavljanje platnog prometa i Agenciji.

Član 23.

Nadležni sud je dužan da u roku od osam dana od dana prijema rješenja iz člana 22. ove uredbe donese rješenje o otvaranju stečajnog postupka nad bankom.

Član 24.

Banka u stečaju dužna je u roku od 15 dana od dana dobivanja rješenja od Narodne banke o ispunjavanju uvjeta za

otvaranje postupka stečaja utvrditi stanje svih poslova u banci i propisanih evidencija za svakog dužnika i povjerioca banke i zapisnik o tome dostaviti Narodnoj banci.

Narodna banka dužna je u roku od 15 dana izvršiti kontrolu zapisnika iz stava 1. ovog člana i dostaviti ga sudu koji provodi postupak stečaja.

Član 25.

Pravne posljedice otvaranja stečajnog postupka nastaju danom donošenja sudskog rješenja o otvaranju stečajnog postupka, čime se sva dugovanja i potraživanja banke smatraju dospjelim, osim potraživanja stranih kreditora koja su osigurana garancijama Republike i Narodne banke.

Član 26.

Potraživanja povjerilaca isplaćuju se iz stečajne mase slijedećim redoslijedom:

- 1) troškovi stečaja banke;
- 2) potraživanja po osnovu depozita građana kod banke;
- 3) potraživanja povjerilaca banke koji nisu dioničari odnosno ulagači banke;
- 4) potraživanja uposlenih radnika banke;
- 5) dioničari odnosno ulagači.

Član 27.

Na stečaj banke, ako ovom uredbom nije drugačije propisano, primjenjuju se odredbe zakona kojim se uređuje stečaj preduzeća izuzev odredaba kojim je uređeno prinudno poravnanje i likvidacija.

IV - UVJETI I POSTUPAK LIKVIDACIJE

Član 28.

Guverner Narodne banke na osnovu odluke dioničara donosi rješenje o likvidaciji banke.

U rješenju iz stava 1. ovog člana navodi se naziv i sjedište banke u likvidaciji i banke koja od banke u likvidaciji preuzima određene poslove.

Rješenje iz stava 1. ovog člana dostavlja se banci u likvidaciji, banci koja od banke u likvidaciji preuzima određene poslove, organizaciji ovlaštenoj za obavljanje platnog prometa i radi provođenja postupka likvidacije banke nadležnom sudu.

Član 29.

Banka u likvidaciji i banka koja je od banke u likvidaciji preuzela određene poslove, u roku od 15 dana od dana dobivanja rješenja iz člana 28. ove uredbe, zapisnički konstatira stanje svih poslova, prava i obaveza.

Evidencije i zapisnik iz stava 1. ovog člana dostavljaju se Narodnoj banci i nadležnom sudu.

Član 30.

Po okončanju postupka likvidacije banke preostala sredstva se dijele na dioničare banke, odnosno ulagača.

Član 31.

Na postupak likvidacije banke, ako ovom uredbom nije drukčije propisano, primjenjuju se odredbe zakona kojim se uređuje likvidacija preduzeća, osim odredaba kojim je uređeno prinudno poravnanje i stečaj.

V - PRIJELAZNE I ZAVRŠNE ODREDBE

Član 32.

Za vrijeme ratnog stanja ili u slučaju neposredne ratne opasnosti i u roku od godinu dana nakon prestanka ratnog stanja, Narodna banka će cijeniti opravdanost pokretanja postupka sanacije, stečaja i likvidacije banke i poduzimati mjere u skladu sa odredbama ove uredbe.

Član 33.

Danom stupanja na snagu ove uredbe prestaje da važi Zakon o sanaciji, stečaju i likvidaciji banaka i drugih finansijskih organizacija ("Službeni list RBiH", broj 2/92).

Član 34.

Ova uredba stupa na snagu danom objavljivanja u "Službenom listu RBiH".

PR broj 1639/94
5. maja 1994. godine
Sarajevo

Predsjednik
Predsjedništva RBiH,
Alija Izetbegović, s. r.

195

Na osnovu Amandmana LI tačka 5. stav 3. na Ustav Republike Bosne i Hercegovine, Predsjedništvo Republike Bosne i Hercegovine, na prijedlog Vlade Republike Bosne i Hercegovine, donosi

UREDBU SA ZAKONSKOM SNAGOM O TRŽIŠTU NOVCA I TRŽIŠTU KAPITALA

Član 1.

Ovom uredbom uređuje se osnivanje tržišta novca i tržište kapitala, njihov status i poslovi posredovanja u prometu novca i vrijednosnih papira.

Član 2.

Tržište novca i tržište kapitala kao organizacije finansijskog posredovanja mogu se osnovati radi povezivanja ponude i tražnje novca i vrijednosnih papira.

Na tržištu novca obavljaju se poslovi posredovanja u prometu novca i kratkoročnih vrijednosnih papira.

Na tržištu kapitala obavljaju se poslovi posredovanja u prometu dugoročnih vrijednosnih papira.

Član 3.

Tržište novca i tržište kapitala mogu osnovati Skupština Republike Bosne i Hercegovine, banke i depozitne organizacije (u daljem tekstu: osnivači).

Tržište novca i tržište kapitala su pravna lica i osnivaju se kao javna preduzeća ili dioničarsko društvo, pod uvjetima propisanim ovim zakonom i aktom o osnivanju i poslovanju tržišta novca i tržišta kapitala.

Tržište novca i tržište kapitala u pravnom prometu istupa u ime i za račun učesnika u radu tržišta.

Član 4.

Aktom iz člana 3. stav 2. ovog zakona utvrđuju se naročito:

- 1) nazivi osnivača tržišta;
- 2) naziv i sjedište tržišta;
- 3) vrsta tržišta i ciljevi zbog kojih se tržište osniva;
- 4) poslovi koje obavlja tržište;
- 5) iznos kapitala i drugi uvjeti koje osiguravaju osnivači za osnivanje tržišta i rok do koga su dužni da osiguraju uvjete za početak rada tržišta;
- 6) obaveze i prava osnivača, način upravljanja, nadležnost organa upravljanja i način odlučivanja;
- 7) kriterijumi za raspodjelu dobiti, način snošenja rizika i pokriva gubitka;
- 8) način rješavanja sporova;
- 9) uvjeti za prestanak rada tržišta i
- 10) lica koja će pripremiti prijedloge statuta, poslovnika o radu i drugih općih akata tržišta i sazvati osnivačku skupštinu tržišta, u slučaju kada se tržište osniva kao dioničarsko društvo.

Član 5.

Osnivači tržišta novca su dužni Narodnoj banci Bosne i Hercegovine (u daljem tekstu: Narodna banka) podnijeti zahtjev za izdavanje dozvole za osnivanje i poslovanje tržišta (u daljnjem tekstu: dozvola) sa slijedećom dokumentacijom:

- 1) ugovor o osnivanju i poslovanju tržišta potpisan od svih osnivača;
- 2) nacrt statuta tržišta i poslovnika o radu;
- 3) elaborat o ekonomsko-finansijskoj opravdanosti osnivanja tržišta; i
- 4) imena najmanje tri lica koja će voditi tržište i vjerodostojne podatke iz kojih je vidljivo da su za to osposobljena.

Član 6.

Na osnovu zahtjeva, dokaza i dokumentacije iz člana 5. ove uredbe. Narodna banka u roku od 30 dana utvrđuje da li su ispunjeni uvjeti za izdavanje dozvole, izdaje dozvolu ili rješenje o odbijanju zahtjeva.

Narodna banka izdaje dozvolu ili rješenje o odbijanju zahtjeva na osnovu odredbi ove uredbe i bližih uvjeta i kriterijuma koje ona propisuje.

Rješenje iz stava 1. ovog člana je konačno u upravnom postupku i protiv njega se može voditi upravni spor.

Član 7.

Osnivači tržišta proglašavaju tržište osnovanim, usvajaju izvještaj o osnivanju tržišta, donose statut i poslovnik o radu tržišta, biraju upravni odbor i druge organe tržišta, imenuju vršioca dužnosti i direktora tržišta i donose druge odluke za početak rada tržišta.

Tržište se upisuje u sudski registar.

Uz prijavu za upis u sudski registar podnose se i:

- 1) akt o osnivanju;
- 2) statut tržišta;
- 3) dozvola Narodne banke; i
- 4) druge isprave u skladu sa propisima o upisu u sudski registar.

Član 8.

Statutom tržišta utvrđuje se naročito:

- 1) unutrašnja organizacija tržišta;
- 2) sastav, način izbora i nadležnost upravnog odbora i drugih organa tržišta i način odlučivanja na tim organima;
- 3) obaveze i prava direktora tržišta i radnika koji obavljaju poslove sa posebnim ovlaštenjima;
- 4) ovlaštenja za potpisivanje i zastupanje tržišta;
- 5) kriteriji o ispunjavanju uvjeta za učesnike u radu tržišta;
- 6) vrsta vrijednosnih papira koji su u prometu na tržištu;
- 7) obaveze i prava učesnika u radu tržišta;
- 8) način obavljanja kontrole poslova na tržištu;
- 9) način donošenja općih i pojedinačnih akata tržišta; i
- 10) način rješavanja sporova koji se odnose na poslove tržišta.

Član 9.

Poslovníkom o radu tržišta utvrđuju se način:

- 1) obavljanja poslova na tržištu;
- 2) utvrđivanja i objavljivanja kamatnih stopa;
- 3) utvrđivanja, obračuna i naplate provizije;
- 4) vođenja jedinstvene evidencije o izdatim vrijednosnim papirima koji su predmet prometa na tržištu;
- 5) organiziranja jedinstvenog informacionog sistema; i
- 6) obavljanja ostalih poslova.

Član 10.

Učesnici u radu tržišta novca mogu biti banke i depozitne organizacije.

Učesnici u radu tržišta kapitala mogu biti banke, depozitne organizacije i druga pravna lica.

Odobrenje za učestvovanje u radu tržišta daje upravni odbor.

Član 11.

Učesnici u radu tržišta istupaju na tržištu u svoje ime i za svoj račun, u svoje ime i za tuđi račun i u ime i za račun drugih lica.

Član 12.

Narodna banka je učesnik u radu tržišta novca po osnovu reguliranih obima ponude i tražnje novca i kratkoročnih vrijednosnih papira.

Narodna banka obavlja kontrolu poslovanja tržišta novca.

Član 13.

Zavisno od obima ponude i tražnje novca i vrijednosnih papira, na tržištu se formira cijena novca i vrijednosnih papira. Cijenu novca i vrijednosnih papira tržište objavljuje u sredstvima javnog informiranja.

Član 14.

Učesnici u radu tržišta plaćaju proviziju po osnovu sklopljenih poslova u prometu novca i vrijednosnih papira.

Član 15.

Tržište organizira jedinstveni informacioni sistem putem kojeg se osiguravaju podaci o: ponudi i tražnji novca i vrijednosnih papira, cijeni novca i vrijednosnih papira, visini kamatne stope, bonitetu izdavaoca vrijednosnih papira, bonitetu vrijednosnih papira, kotaciji vrijednosnih papira i drugim informacijama značajnim za rad tržišta.

Podaci iz stava 1. ovog člana javno se objavljuju.

Član 16.

Danom stupanja na snagu ove uredbe prestaje da važi Zakon o tržištu novca i tržištu kapitala ("Službeni list RBiH", broj 2/92).

Član 17.

Ova uredba stupa na snagu danom objavljivanja u "Službenom listu RBiH".

PR broj 1640/94
5. maja 1994. godine
Sarajevo

Predsjednik
Predsjedništva RBiH,
Alija Izetbegović, s. r.

196

Na osnovu Amandmana LI tačka 5. stav 3. na Ustav Republike Bosne i Hercegovine, Predsjedništvo Republike Bosne i Hercegovine, na prijedlog Vlade Republike Bosne i Hercegovine, donosi

UREDBU SA ZAKONSKOM SNAGOM O VRIJEDNOSNIM PAPIRIMA

I - OPĆE ODREDBE

Član 1.

Ovom uredbom se uređuju uvjeti, način izdavanja i prijenos dionice, obveznice, blagajničkog zapisa, sertifikata i komercijalnih zapisa (u daljem tekstu: vrijednosni papir).

Odredbe ove uredbe primjenjuju se i na druge vrijednosne papire ako drugim zakonom nije drukčije određeno.

Član 2.

Vrijednosni papir u smislu ove uredbe, je pisana isprava koja glasi na ime ili na donosioca.

Vrijednosni papir može biti kratkoročni sa rokom do godinu dana i dugoročni sa rokom preko godinu dana.

Vrijednosni papir glasi na određenu nominalnu vrijednost u dinarima.

Vrijednosni papir može glasiti i na strana sredstva plaćanja.

Član 3.

Vrijednosne papire mogu izdavati pravna lica (u daljem tekstu: izdavalac).

Izdavalac vrijednosnog papira vodi knjigu o izdatim i prenesenim vrijednosnim papirima - matična ili glavna knjiga.

Član 4.

Ocjenu ispunjavanja uvjeta za izdavanje dugoročnih, vrijednosnih papira obavlja Komisija za vrijednosne papire.

Član 5.

Izdavalac vrijednosnog papira dužan je izvršavati sve obaveze iz vrijednosnog papira, u roku i na način predviđen propisom o njegovom izdavanju, zakonom ili odlukom o njihovom izdavanju.

Prava i obaveze iz vrijednosnog papira nastaju kada izdavalac vrijednosni papir preda kupcu ili njegovom ovlaštenom zastupniku.

Član 6.

Vrijednosni papir koji glasi na ime prenosi se punim indosamentom, ako na njemu nije izričito označeno da se ne može prenositi.

Vrijednosni papir koji glasi na donosioca prenosi se predajom.

Član 7.

Vrijednosni papir može se koristiti za izmirenje obaveza prema povjeriocu, uz uvjete i način propisan zakonom i ugovorom.

Vrijednosni papir može se koristiti i za osiguranje plaćanja njegovim zalogom.

Član 8.

Prava iz nestalog vrijednosnog papira mogu se ostvariti samo ako taj vrijednosni papir glasi na ime.

Prava iz stava 1. ovog člana ostvaruju se u vanparničkom postupku.

II - VRSTE VRIJEDNOSNIH PAPIRA

1. Dionica

Član 9.

Dionica je isprava sa pravom učešća.

Imalac dionice stiče pravo učešća u dobiti, a zavisno od vrste dionice i pravo učešća u upravljanju, druga prava i prioritete saglasno statutu izdavaoca dionice.

Član 10.

Dionica se uplaćuje u novcu, a može i u stvarima i pravima iskazanim u novčanom iznosu, u skladu sa ugovorom, statutom i odlukom o izdavanju dionica iz člana 14. ovog zakona.

Član 11.

Sredstva za kupovinu dionice mogu se uplatiti odjednom ili u ratama.

Ako se uplata vrši u ratama, kupac dionice dobiva privremenu dionicu, s tim što se svaka iduća uplata upisuje i potvrđuje na samoj privremenoj dionici.

Privremena dionica se povlači i zamjenjuje stalnom dionicom kada imalac privremene dionice uplati ukupan iznos svog udjela.

Ako ukupni iznos na koji se raspisuju dionice nije ostvaren u skladu sa odlukom o izdavanju dionica izdavalac dionica dužan je uplatiocima vratiti uplaćena novčana sredstva s kamatom utvrđenom odlukom o izdavanju dionica koja se obračunava od dana uplate do dana povrata ili smanjiti ukupan iznos na koji se izdaju dionice.

Član 12.

Imalac dionice ima pravo na dio ostvarene dobiti koja se raspoređuje na dividendu.

U stečajnom postupku imalac dionice ima pravo na srazmjernan dio stečajne mase, koja se raspoređuje dioničarima.

Član 13.

Skupština ili njoj odgovarajući organ upravljanja izdavaoca dionica donosi odluku kojom utvrđuje visinu dividende, način i vrijeme njene isplate.

Član 14.

Odluku o izdavanju dionica donosi nadležni organ upravljanja.

Odlukom o izdavanju dionica utvrđuje se naročito: naziv izdavaoca dionica; oznaka da dionica glasi na donosioca ili na ime; ukupni iznos na koji se izdaju dionice i broj dionica; nominalna vrijednost dionica; broj glasova koji daje dionica, ako se stiče pravo upravljanja u skladu sa članom 11. ove uredbe; način isplate dividende; vrijeme upisa dionica; način upisa dionica; kod koga se i u kom roku uplaćuju sredstva za kupovinu dionica; u kom se roku vraćaju uplaćena sredstva u slučaju odustajanja od izdavanja dionica; vrsta dionica; redoslijed ostvarivanja prvenstva kada se prioritetne dionice izdaju u više serija; način objavljivanja i izdavanja dionica; postupak raspodjele i distribucije dionica; način plaćanja dionica; utvrđivanje uvjeta za isplatu kumulativne dividende; snošenje rizika; način raspolaganja dionicama; mogućnost zamjene konverzije dionica; prava koja ostvaruje imalac prioritetne dionice; pravo prvenstva kupovine imalaca dionica kod novog izdavanja dionica i druga pitanja u vezi sa izdavanjem dionica.

Odlukom o izdavanju dionica može se predvidjeti izdavanje potvrde kojom se potvrđuje da imalac posjeduje broj dionica označen u potvrdi.

Član 15.

Dionica sadrži slijedeće osnovne elemente: oznaku da je dionica; oznaku vrste dionica; naziv i sjedište izdavaoca dionica; naziv kupca dionice ili oznaku na koga glasi dionica; ukupan novčani iznos na koji se izdaju dionice i broj dionica; rokove isplate dividende; mjesto, datum izdavanja i serijski broj sa kontrolnim brojem dionice; faksimil potpisa predsjednika ili člana upravnog odbora izdavaoca dionice i prava iz dionice.

Član 16.

Prema redoslijedu izdavanja, dionica može biti osnivačka - dionica prve emisije ili dionica narednih emisija.

Prema sadržaju prava dionica iz stava 1. ovog člana može biti obična (redovna) ili prioriteta (povlašćena ili preferencijalna).

Član 17.

Dionica iz člana 14. ove uredbe može biti bez prava glasa i sa pravom na jedan ili više glasova.

Član 18.

Imalac prioriteta dionice u odnosu na imaoa obične dionice ima pravo prvenstva naplate dividende, naplate u postupku stečaja izdavaoca dionice kao i druga prava prvenstva koja se utvrđuju odlukom iz člana 14. ovog zakona.

Član 19.

Prioriteta dionica može biti kumulativna i participativna.

Kumulativna prioriteta dionica daje imaoa dionice pravo naplate kumuliranih nenaplaćenih dividendi prije naplate bilo kakvih dividendi imaoima običnih dionica u skladu sa odlukom iz člana 14. ove uredbe.

Participativna prioriteta dionica, osim određene dividende, donosi i pravo učešća u raspodjeli dobiti, u skladu sa odlukom iz člana 16. ove uredbe.

2. Obveznice

Član 20.

Obveznica je pisana isprava kojom se izdavalac obavezuje da će licu označenom u obveznici ili po njegovoj naredbi odnosno donosiocu obveznice isplatiti određenog dana iznos naveden u obveznici odnosno iznos anuitetskog kupona.

Izuzetno od odredbe iz stava 1. ovog člana može se izdavati i participativna obveznica, koja imaoa kamata daje i pravo na učešće u dobiti izdavaoca obveznice.

Obveznica iz stava 1. ovog člana može biti garantirana i negarantirana, zavisno od toga da li je za isplatu obaveza po izdatoj obveznici data garancija.

Član 21.

Izdavalac obveznice može izdati obveznicu u svoje ime i za svoj račun.

Banka i druga finansijska organizacija mogu izdati obveznicu u svoje ime i za svoj račun, u svoje ime a za račun drugih lica, u ime i za račun drugih lica.

Član 22.

Pravno lice može izdavaocu obveznica dati garanciju za izvršenje svih ili određenih obaveza što ih je izdavalac obveznica preuzeo prema imaoima obveznica.

Član 23.

Zakonom ili odlukom o izdavanju obveznica koju donosi organ upravljanja izdavaoca obveznica utvrđuju se naročito; ukupni iznos na koji se izdaju obveznice; namjena za koju se izdaju obveznice; unošenje podataka o garantu ako je obveznica sa garancijom; način izdavanja obveznica; rokovi otplate glavnice; visina kamatne stope ako je predviđeno plaćanje kamate; način obračuna i plaćanja kamate; udio u dobiti ako je učešće u dobiti predviđeno; izvori sredstava iz kojih će se isplaćivati obveznice; prava iz prijenosa obveznica; sudska zaštita u naplati glavnice i kamate i mogućnost zamjene za druge vrste vrijednosnih papira iz ove uredbe.

Aktom o izdavanju obveznica iz stava 1. ovog člana mogu se kupcima obveznica utvrditi posebne olakšice ili pogodnosti.

Član 24.

Obaveza iz obveznice koja glasi na strana sredstva plaćanja isplaćuje se u dinarima ili u stranim sredstvima plaćanja, u skladu sa zakonom kojim se uređuje devizno poslovanje.

Ako se obaveza isplaćuje u dinarima obračun se obavlja po deviznom kursu na dan isplate.

Član 25.

Kupac obveznice stiče pravo na obveznicu kada u cijelosti uplati obveznicu.

Član 26.

Izdavalac obveznica može izvršiti obaveze iz obveznica prije ugovorenih rokova ako je to predviđeno zakonom ili odlukom iz člana 23. ove uredbe.

Član 27.

Obveznica sadrži slijedeće osnovne elemente: oznaku da je obveznica; naziv i sjedište izdavaoca obveznice; naziv i sjedište kupca obveznice ili oznaku da obveznica glasi na donosioca; novčani iznos na koji glasi obveznica; visinu kamatne stope ako je plaćanje kamate predviđeno; postotak učešća u dobiti ako je to učešće predviđeno; rokove otplate glavnice i kamate; mjesto i datum izdavanja te serijski i kontrolni broj obveznice; faksimil potpisa ovlašćenih lica izdavaoca obveznice i druga prava iz obveznice.

Na prednjoj strani obveznice sa garancijom označava se naziv i sjedište garanta.

Na poleđini obveznice označavaju se rokovi otplate glavnice, kamate odnosno anuiteta (amortizacioni plan).

Član 28.

Obveznica koja se ne isplaćuje u jednom iznosu ima najmanje dva dijela.

U prvom dijelu obveznice moraju biti označeni svi osnovni elementi iz člana 27. st. 1. i 2. ove uredbe.

Drugi dio obveznice - talon čine, zavisno od načina amortizacije glavnice, anuitetski i kamatni kuponi.

Član 29.

Obveznica se može zamjenjivati za druge vrste vrijednosnih papira u skladu sa zakonom i odlukom iz člana 23. ove uredbe.

3. Blagajnički zapis

Član 30.

Blagajnički zapis je vrijednosni papir koji glasi na određeni novčani iznos, s određenim rokom dospjeća i određenom kamatnom stopom.

Blagajnički zapis mogu izdati Narodna banka Bosne i Hercegovine (u daljem tekstu: Narodna banka), banke, depozitne organizacije i društveno-političke zajednice.

Banke, depozitne organizacije i društveno-političke zajednice prodajom blagajničkih zapisa prikupljaju kratkoročna novčana sredstva.

Član 31.

Blagajnički zapisi izdaju se na osnovu odluke izdavaoca. Narodna banka propisuje sadržaj odluke iz stava 1. ovog člana.

Blagajnički zapisi izdaju se s rokom dospjeća do jedne godine.

Član 32.

Blagajnički zapis sadrži slijedeće osnovne elemente: oznaku da je blagajnički zapis; naziv i sjedište izdavaoca blagajničkog zapisa; naziv i sjedište upisnika blagajničkog zapisa odnosno oznaku da blagajnički zapis glasi na donosioca; novčani iznos na koji blagajnički zapis glasi; visinu kamatne stope; rok otplate glavnice i kamate; mjesto i datum izdavanja; serijski broj s kontrolnim brojem blagajničkog zapisa; faksimil potpisa ovlašćenih lica izdavaoca blagajničkog zapisa.

Član 33.

Izdavalac blagajničkog zapisa određuje: iznos na koji glasi blagajnički zapis, apocenski sastav blagajničkog zapisa i visinu kamatne stope po blagajničkom zapisu.

Član 34.

Blagajničke zapise koje izdaje Narodna banka mogu upisivati banke i depozitne organizacije.

Blagajničke zapise koje izdaje banka, depozitna organizacija i društveno-politička zajednica mogu upisivati preduzeća i druga pravna i fizička lica.

4. Certifikat

Član 35.

Certifikat je pisana isprava o deponovanim sredstvima kod banke ili depozitne organizacije s rokom vraćanja dužim od jedne godine.

Član 36.

Certifikat sadrži slijedeće osnovne elemente; oznaku da je certifikat o deponovanim sredstvima kod banke ili depozitne organizacije; naziv i sjedište izdavaoca certifikata; naziv i sjedište korisnika certifikata odnosno da glasi na donosioca; iznos na koji certifikat glasi; rok na koji su sredstva deponovana; visinu kamatne stope; način obračuna i isplate kamate; datum i mjesto izdavanja certifikata; serijski broj s kontrolnim brojem; prava imaoca certifikata i faksimil potpisa ovlašćenih lica izdavaoca certifikata.

5. Komercijalni zapis

Član 37.

Komercijalni zapis je vrijednosni papir čijom se prodajom prikupljaju kratkoročna novčana sredstva.

Komercijalni zapis izdaju preduzeća i druga pravna lica.

Član 38.

Odluku o izdavanju komercijalnih zapisa donosi organ upravljanja izdavaoca komercijalnih zapisa.

Odlukom iz stava 1. ovog člana utvrđuje se naročito: ukupan iznos na koji se izdaju komercijalni zapisi; namjena za koju se izdaju; rok otplate; visina kamatne stope ako je predviđeno plaćanje kamate i pogodnosti koje se daju imaocima komercijalnih zapisa.

Član 39.

Komercijalni zapis sadrži slijedeće elemente: oznaku da je komercijalni zapis; naziv i sjedište izdavaoca komercijalnog zapisa; novčani iznos na koji komercijalni zapis glasi; visinu kamatne stope ako je plaćanje kamate predviđeno; mjesto i datum izdavanja komercijalnog zapisa; serijski broj s kontrolnim brojem i faksimil potpisa ovlašćenih lica izdavaoca komercijalnog zapisa.

6. Ostali vrijednosni papiri

Član 40.

Pravna lica mogu izdavati i prenositi i druge vrijednosne papire u skladu sa svojim interesima i tržišnim uvjetima.

III - KOMISIJA ZA VRIJEDNOSNE PAPIRE

Član 41.

Komisija za vrijednosne papire (u daljem tekstu: Komisija) je pravno lice.

Sjedište Komisije je u Sarajevu.

Član 42.

Vlada Republike Bosne i Hercegovine (u daljem tekstu: Vlada), na prijedlog Ministarstva finansija imenuje Komisiju, na period od četiri godine.

Komisija se sastoji od predsjednika, šest članova i sekretara.

Član 43.

Komisija obavlja slijedeće poslove:

1) daje odobrenje za izdavanje dugoročnih vrijednosnih papira i dozvola za početak rada tržišta kapitala u zemlji;

2) prati rad tržišta kapitala, preduzima i predlaže mjere za sprečavanje štetnih spekulativnih poslova na tržištu kapitala;

3) obavlja i druge poslove utvrđene zakonom.

Član 44.

Izdavalac dugoročnih vrijednosnih papira dužan je da za svako izdavanje vrijednosnih papira podnese zahtjev Komisiji. Uz zahtjev prilaže se mišljenje ovlaštene organizacije o bonitetu izdavaoca vrijednosnih papira, odluka nadležnog organa izdavaoca o izdavanju vrijednosnih papira i druga dokumentacija koju propiše Komisija.

Zahtjev iz stava 1. ovog člana nisu dužni podnositi izdavaocidionica pri osnivanju dioničarskog društva i Republika Bosna i Hercegovina (u daljem tekstu: Republika) kao izdavalac dugoročnih vrijednosnih papira.

Član 45.

Komisija, na osnovu zahtjeva i dokumentacije iz člana 44. ove uredbe, odlučuje rješenjem u roku od 30 dana od dana podnošenja zahtjeva.

Izdavalac ne može izdati dugoročne vrijednosne papire prije dobivanja rješenja iz stava 1. ovog člana, niti suprotno tom rješenju.

Rješenje iz stava 1. ovog člana je konačno i protiv njega se može voditi upravni spor.

Komisija propisuje sadržinu dokumentacije koja se podnosi uz zahtjev za davanje odobrenja o izdavanju dugoročnih vrijednosnih papira, pravila o radu učesnika na tržištu kapitala, i druga pitanja u vezi sa radom Komisije.

Pravila iz stava 4. ovog člana obavezna su za sve izdavaoce dugoročnih vrijednosnih papira, za tržište kapitala i sve učesnike na tom tržištu.

Komisija je dužna da čuva poslovne tajne.

Član 46.

Rješenje iz člana 45. stav 1. ovog zakona dostavlja se izdavaocu dugoročnih vrijednosnih papira, Ministarstvu finansija i organizaciji ovlaštenoj za obavljanje platnog prometa.

Rješenje iz stava 1. ovog člana objavljuje se u "Službenom listu RBiH".

Komisija vodi evidenciju o podnesenim zahtjevima i izdatim rješenjima.

Član 47.

Ministarstvo finansija vodi registar izdatih odobrenja za izdavanje dugoročnih vrijednosnih papira i registar o izdatim dugoročnim vrijednosnim papirima.

U registar iz stava 1. ovog člana unose se slijedeći podaci:

- vrsta dugoročnog vrijednosnog papira;
- naziv i sjedište izdavaoca vrijednosnog papira;
- serijski i kontrolni broj izdavaoca vrijednosnog papira.

Izdavaoc iz člana 44. ove uredbe dužan je nakon izdavanja dugoročnih vrijednosnih papira Ministarstvu finansija dostaviti podatke iz stava 2. ovog člana, radi upisa u registar.

Član 48.

Tržište kapitala podnosi Komisiji zahtjev radi davanja odobrenja za početak rada tržišta kapitala.

Uz zahtjev, tržište kapitala podnosi statut tržišta i poslovnik o radu tržišta.

O izmjenama statuta i poslovnika tržište kapitala je dužno da obavijesti Komisiju.

Član 49.

Na osnovu zahtjeva i dokumentacije iz člana 48. ove uredbe, Komisija je dužna donijeti rješenje u roku od 30 dana od dana podnošenja zahtjeva i dokumentacije.

Tržište kapitala ne može početi rad prije dobivanja rješenja iz stava 1. ovog člana, niti suprotno rješenju.

Rješenje iz stava 1. ovog člana je konačno i protiv njega se može voditi upravni spor.

Komisija vodi evidencije o podnesenim zahtjevima za početak rada tržišta kapitala i izdatim rješenjima.

Rješenja iz stava 1. ovog člana objavljuju se u "Službenom listu RBiH".

Član 50.

Komisija prati rad tržišta kapitala i ako utvrdi da se tržište ne pridržava pravila iz člana 45. ove uredbe, može privremeno zabraniti rad tržišta dok se ne otklone utvrđene nepravilnosti.

Član 51.

Komisija ima Statut koji potvrđuje Vlada.

Statutom Komisije uređuje se naročito:

- 1) organizacija i način poslovanja Komisije;
- 2) ovlaštenja za zastupanje i potpisivanje Komisije;
- 3) obaveza i prava predsjednika i članova Komisije, sekretara Komisije i radnika koji obavljaju poslove i zadatke sa posebnim ovlaštenjima;
- 4) druga pitanja u vezi sa radom Komisije.

Član 52.

Komisija ostvaruje prihode iz naknade koju izdavalac dugoročnih vrijednosnih papira uplaćuje Komisiji prilikom podnošenja zahtjeva za davanje odobrenja o izdavanju dugoročnih vrijednosnih papira, iz naknade koja se uplaćuje Komisiji prilikom podnošenja zahtjeva za davanje odobrenja za početak rada tržišta kapitala, sredstava republičkog budžeta i drugih prihoda.

Visinu naknada iz stava 1. ovog člana i način plaćanja na prijedlog Komisije utvrđuje Vlada.

Član 53.

Iz prihoda koje ostvari Komisija u skladu sa članom 53. ove uredbe podmiruju se troškovi poslovanja i drugi rashodi Komisije.

Član 54.

Komisija je dužna da do kraja tekuće godine donese finansijski plan za narednu godinu i do kraja prvog tromjesečja naredne godine godišnji obračun za prethodnu godinu.

Izuzetno, ukoliko se finansijski plan ne donese u roku iz stava 1. ovog člana, Komisija donosi odluku o privremenom finansiranju.

Član 55.

Vlada potvrđuje finansijski plan i godišnji obračun iz člana 54. ovog zakona.

Član 56.

Komisija najmanje jedanput godišnje podnosi Vladi izvještaj o svom radu.

Komisija i sekretar Komisije za svoj rad odgovorni su Vladi.

IV - KAZNE NE ODREDBE

Član 57.

Novčanom kaznom od 500 do 6.000 DEM u dinarskoj protivrijednosti po srednjem kursu koji utvrđuje i objavljuje Narodna banka, kaznit će se za privredni prijestup preduzeće, banka i drugo pravno lice:

- 1) ako izda vrijednosni papir koji ne sadrži osnovne elemente propisane ovim zakonom (čl. 15., 27., 33., 38. i 40.);
- 2) ako odbije da izvrši šve obaveze iz vrijednosnog papira, u rokovima i na način koji su predviđeni zakonom i odlukom o izdavanju vrijednosnog papira (član 5. stav 1.);
- 3) ako izda dugoročni vrijednosni papir prije dobivanja odobrenja komisije, odnosno suprotno dobijenom rješenju (član 45. stav 2.);
- 4) ako izdavalac nakon izdavanja dugoročnih vrijednosnih papira ne dostavi Ministarstvu finansija podatke radi upisa u registar (član 47.);
- 5) ako tržište kapitala počne sa radom prije dobivanja odobrenja Komisije, odnosno suprotno dobijenom rješenju (član 55. stav 2.).

Novčanom kaznom od 20 do 400 DEM u dinarskoj protivrijednosti po srednjem kursu koji utvrđuje i objavljuje Narodna banka, kaznit će se za privredni prijestup direktor i drugi odgovorni radnik u preduzeću, banci i drugom pravnom licu za radnje iz stava 1. ovog člana.

V - PRIJELAZNE I ZAVRŠNE ODREDBE

Član 58.

Obaveze po izdatim vrijednosnim papirima do dana stupanja na snagu ove uredbe, izvršavat će se u skladu sa odredbama Zakona o vrijednosnim papirima ("Službeni list RBiH", broj 2/92).

Član 59.

Za vrijeme ratnog stanja ili u slučaju neposredne ratne opasnosti, poslove iz nadležnosti Komisije obavljat će Ministarstvo finansija.

Član 60.

Pravna lica koja su podnijela zahtjev za dobijanje odobrenja o izdavanju dugoročnih vrijednosnih papira i zahtjev za početak rada tržišta kapitala u zemlji, po kojim nije doneseno rješenje, dužna su da dokumentaciju usklade sa odredbama čl. 44. i 48. ovog zakona u roku od 20 dana od dana stupanja na snagu ove uredbe.

Član 61.

Danom stupanja na snagu ove uredbe prestaje da važi Zakon o vrijednosnim papirima ("Službeni list RBiH", broj 2/92).

Član 62.

Ova uredba stupa na snagu danom objavljivanja u "Službenom listu RBiH".

PR broj 1641/94

5. maja 1994. godine
Sarajevo

Predsjednik
Predsjedništva RBiH,
Alija Izetbegović, s. r.

197

Na osnovu Amandmana LI tačka 5. stav 3. na Ustav Republike Bosne i Hercegovine, Predsjedništvo Republike Bosne i Hercegovine, na prijedlog Vlade Republike Bosne i Hercegovine, donosi

UREDBU SA ZAKONSKOM SNAGOM O DEVIZNOM POSLOVANJU

I - OSNOVNE ODREDBE

Član 1.

Naplaćivanje i plaćanja u devizama i dinarima u poslovanju sa inozemstvom i drugom deviznom poslovanju ostvaruje se po odredbama ove uredbe.

Član 2.

Devize, u smislu ove uredbe, su tekuća potraživanja prema inozemstvu koja glase na strana sredstva plaćanja i efektivni strani novac, osim kovanog zlatnog novca.

Član 3.

Devize se mogu koristiti samo za plaćanje prema inozemstvu osim ako ovom uredbom nije drugačije određeno.

Član 4.

Devizna politika Republike Bosne i Hercegovine utvrđuje se odlukom o ciljevima i zadacima devizne politike i platnim bilansom.

Član 5.

Kupovina i prodaja deviza vrši se na deviznom tržištu. Narodna banka Bosne i Hercegovine (u daljem tekstu: Narodna banka) i banke mogu i na stranom deviznom tržištu kupovati i prodavati devize.

Član 6.

Devizni kurs je cijena deviza izražena u dinarima. Devizni kurs se formira na deviznom tržištu u skladu sa ponudom i tražnjom deviza.

Član 7.

Platni promet sa inozemstvom obavljaju banke. Platni promet sa inozemstvom za potrebe Republike Bosne i Hercegovine (u daljem tekstu: Republika), njenih organa i

organizacija obavlja Narodna banka koja u tim poslovima ima ista prava i obaveze koje su ovom uredbom propisane za banke.

Član 8.

Pod bankom, u smislu ove uredbe, podrazumijeva se banka koja u skladu sa članom 22. Uredbe sa zakonskom snagom o bankama ("Službeni list RBiH", broj 10/94) dobije odobrenje za vršenje devizno-valutnih poslova, platni promet sa inozemstvom i kreditno-garancijske poslove sa inozemstvom.

Član 9.

Plaćanje po tekućim transakcijama sa inozemstvom obavlja se slobodno.

Pod plaćanjem po tekućim transakcijama sa inozemstvom, u smislu ove uredbe, podrazumijeva se plaćanje prema inozemstvu radi obavljanja vanjskotrgovinskog prometa, uključujući usluge, otplate dospjelih obaveza po kreditima uzetim u inozemstvu, kao i plaćanje po drugim tekućim poslovima po kojima se ne vrši transfer kapitala u inozemstvo.

Član 10.

Narodna banka odgovorna je za opću likvidnost plaćanja prema inozemstvu.

Banke i druga pravna lica odgovorna su za sopstvenu likvidnost plaćanja prema inozemstvu.

Narodna banka, po osnovu svoje odgovornosti za opću likvidnost plaćanja prema inozemstvu, ne preuzima obaveze plaćanja umjesto banaka i drugih pravnih lica, ako ovim uredbom ili drugim propisom nije drukčije određeno.

Član 11.

Narodna banka i banke mogu držati devize na računu u inozemstvu.

Preduzeća i druga pravna lica mogu držati devize na računu kod banke.

Za plaćanje troškova po investicionim radovima u inozemstvu, troškova predstavništava i usluga u međunarodnom robnom i putničkom saobraćaju i osiguranja, kao i za polaganje depozita, Narodna banka, pod uvjetima koje propiše Vlada Republike Bosne i Hercegovine (u daljem tekstu: Vlada) može odobriti preduzeću i drugom pravnom licu držanje deviza i na računu u inozemstvu.

Izuzetno, Narodna banka može odobriti držanje deviza na računu u inozemstvu i za druge namjene, pod uvjetima koje propiše Vlada.

Član 12.

Domaća i strana fizička lica mogu devize držati na računu kod banke i slobodno ih koristiti.

Banke su dužne da devize iz stava 1. ovog člana osiguraju u skladu sa zakonom kojim se regulira osiguranje depozita.

Član 13.

Domaće lice, u smislu ove uredbe, je pravno lice sa sjedištem u Republici i fizičko lice sa prebivalištem u Republici.

Strano lice, u smislu ove uredbe, je pravno lice sa sjedištem u Republici i inozemstvu i fizičko lice sa prebivalištem u inozemstvu.

Pod pravnim licem, u smislu ove uredbe, podrazumijeva se i gradansko-pravno lice.

Pod fizičkim licem, u smislu ove uredbe, podrazumijeva se samostalni privrednik.

Član 14.

Devizno poslovanje domaćih i stranih lica podliježe kontroli i nadzoru.

II - DEVIZNA POLITIKA REPUBLIKE BOSNE I HERCEGOVINE

Član 15.

Devizna politika Republike Bosne i Hercegovine (u daljem tekstu: devizna politika) utvrđuje se za svaku godinu odlukom o ciljevima i zadacima devizne politike i platnim bilansom.

Odlukom o ciljevima i zadacima devizne politike propisuje se naročito politika:

- 1) izvoza i uvoza robe i usluga;
- 2) drugih oblika ekonomskih odnosa sa inozemstvom;

3) deviznog kursa;

4) rezervi i

5) zaštite domaće privrede.

Platnim bilansom utvrđuju se finansijske i druge ekonomske transakcije između domaćih i stranih lica, a naročito:

- 1) priliv i odliv deviza po osnovu izvoza i uvoza roba i usluga;
- 2) jednostrani transferi;
- 3) kapitalna ulaganja;
- 4) kreditni poslovi sa inozemstvom i
- 5) rezerve.

Član 16.

Odluku o ciljevima i zadacima devizne politike i platni bilans donosi Skupština Republike Bosne i Hercegovine (u daljem tekstu: Skupština) na prijedlog Narodne banke.

Član 17.

Narodna banka podnosi Skupštini polugodišnje, odnosno po potrebi, izvještaj o provođenju devizne politike.

Član 18.

Narodna banka propisuje metodologiju za utvrđivanje, evidentiranje i praćenje platnog bilansa po svim osnovama priliva i odliva deviza i kapitala i objavljuje podatke o platnom bilansu.

III - DEVIZNO TRŽIŠTE I DEVIZNI KURS

Član 19.

Devizno tržište čine svi poslovi kupovine i prodaje deviza, osim efektivnog stranog novca, između domaćih lica i domaćih i stranih lica, koji se obavljaju institucionalizirano preko devizne berze ili neposredno između banaka.

Poslove kupovine i prodaje efektivnog stranog novca, putničkih i bankarskih čekova, kreditnih pisama, bonova za putarinu za vozila inozemne registracije, benzinskih bonova i drugih vrijednosnih papira koji glase na strana sredstva plaćanja obavljaju banke i druga domaća pravna lica ako sa bankom zaključe ugovor o obavljanju ovih poslova (u daljem tekstu: mjenjački poslovi).

Narodna banka propisuje način obavljanja mjenjačkih poslova.

Član 20.

Devizna berza je specijalizirana organizacija finansijskog posredovanja u prometu devizama koja se osniva u skladu sa Uredbom sa zakonskom snagom o tržištu novca i tržištu kapitala ("Službeni list RBiH", broj 10/94).

Član 21.

Domaće pravno lice može na domaćem i stranom tržištu obavljati kupovinu i prodaju potraživanja prema inozemstvu.

Poslove iz stava 1. ovog člana domaće pravno lice obavlja u svoje ime i za svoj račun, a banka i u svoje ime i za tui račun i u tui ime i za tui račun.

Uvjete i način obavljanja poslova iz stava 1. ovog člana propisuje Narodna banka.

Član 22.

Narodna banka intervenira na deviznom tržištu i pojavljuje se kao kupac ili prodavac deviza radi premošćavanja vremen-ske neusklađenosti deviznog priliva i odliva, održavanja opće likvidnosti plaćanja prema inozemstvu i ostvarivanja politike deviznog kursa, deviznih rezervi i platnog bilansa.

Član 23.

Na osnovu kupovine i prodaje devizna na deviznoj berzi formira se kupovni i prodajni kurs deviza.

Na osnovu kupovnog i prodajnog kursa izračunava se srednji kurs.

Devizni kurs može biti različit za efektivni strani novac, devizna potraživanja i vrijednosne papire.

Član 24.

Srednji kurs se primjenjuje za obračun i utvrđivanje deviznih potraživanja i obaveza i njihovo iskazivanje u dinarima na kraju mjeseca, kao i za obračun, naplatu i povraćaj carina i drugih dažbina.

drugi razlozi zahtijevaju, Vlada može ograničiti ili zabraniti izvoz i iznošenje zlata u inozemstvo i ograničiti promet zlata u Republici.

Član 42.

Narodna banka može da izvozi i iznosi zlato u inozemstvo i da uvozi i unosi zlato iz inozemstva.

Član 43.

Topljenje neprerađenog zlata mogu vršiti preradivači zlata. Topljenje kovanog zlata nije dozvoljeno.

Član 44.

Devizne rezerve čine potraživanja na računima u inozemstvu, efektivni strani novac i vrijednosni papiri izdati u inozemstvu koji glase na strana sredstva plaćanja kod Narodne banke i banaka.

Član 45.

Devizne rezerve se sastoje od stalnih i tekućih rezervi. Stalnim deviznim rezervama osigurava se minimum opće likvidnosti plaćanja prema inozemstvu.

Tekućim deviznim rezervama se obezbjeđuje tekuća likvidnost plaćanja prema inozemstvu.

Član 46.

Narodna banka upravlja stalnim i tekućim deviznim rezervama, osim dijela tekućih rezervi kojima upravljaju banke.

Član 47.

Radi održavanja likvidnosti u plaćanju prema inozemstvu, u okviru utvrđene devizne politike, Narodna banka može propisati obavezu da se unaprijed prijavljuje plaćanje prema inozemstvu, obavezu banke da drži određeni iznos u devizama ili likvidnim deviznim plasmanima kao minimalnu rezervu i druge mjere za koje je ovlaštena zakonom.

VI - IZNOŠENJE I UNOŠENJE DINARA I DEVIZA

Član 48.

Iznošenje dinara iz Republike i unošenje dinara u Republiku u putničkom prometu vrši se u iznosima i apoenima koje propiše Narodna banka.

Iznošenje i unošenje dinara, vrijednosnih papira i vrijednosnica koje glase na dinare putem poštanskih pošiljki obavlja se po odobrenju Narodne banke.

Član 49.

Iznošenje efektivnog stranog novca, vrijednosnih papira i vrijednosnica koje glase na strana sredstva plaćanja obavlja se pod uvjetima koje propiše Narodna banka.

Član 50.

Unošenje deviza u Republiku je slobodno.

VII - KONTROLA

Član 51.

Pod kontrolom, u smislu ove uredbe, podrazumijeva se provjera primjene zakona i drugih propisa iz oblasti deviznog i vanjskotrgovinskog poslovanja, kreditnih poslova sa inozemstvom, obavljanja privredne djelatnosti u inozemstvu i carinskih poslova, kao i preduzimanje mjera u slučaju povrede ovih propisa.

Poslove kontrole obavlja Narodna banka i ministarstva i drugi republički organi državne uprave nadležni za poslove kontrole, u okviru svojih prava i obaveza propisanih zakonom.

Član 52.

Ministarstva i drugi republički organi državne uprave vrše kontrolu deviznog i vanjskotrgovinskog poslovanja i kreditnih poslova sa inozemstvom preduzeća i svih oblika obavljanja privrednih djelatnosti u inozemstvu, društveno-političkih zajednica i njihovih organa i organizacija, fondova i drugih pravnih i fizičkih lica.

Narodna banka obavlja kontrolu provođenja devizne politike i propisa kojima su uređeni devizno poslovanje, kreditni poslovi sa inozemstvom, promet roba i usluga sa inozemstvom i obavljanje privredne djelatnosti u inozemstvu.

Blíže uvjete i način vršenja devizne dokumentarne kontrole, kao i vrstu, rokove i postupak preduzimanja mjera iz stava 2. ovog člana propisuje Narodna banka.

Član 53.

Ministarstva i drugi republički organi državne uprave obavlja kontrolu provođenja devizne politike i propisa kojima su uređeni devizno poslovanje, kreditni poslovi sa inozemstvom, promet roba i usluga sa inozemstvom i obavljanje privredne djelatnosti u inozemstvu i po osnovu:

- 1) ispravnosti obračuna, naplate i povraćaja poreza, carina i drugih dažbina;
- 2) iznošenja iz Republike i unošenja u Republiku dinara, efektivnog stranog novca, zlata i vrijednosnih papira; i
- 3) poslova sa inozemstvom radi sprečavanja neobjavljene konkurencije između domaćih pravnih lica na inozemnom tržištu i realizacije zaključenih štetnih ugovora između domaćih i stranih lica.

Član 54.

Pri obavljanju poslova kontrole u smislu člana 52. ove uredbe ministarstva i drugi republički organi državne uprave i Narodna banka imaju pravo uvida u poslovne knjige i ostalu dokumentaciju lica koja podliježu kontroli, u skladu sa ovom uredbom.

Banka i drugo pravno lice obavezno su da na zahtjev ministarstava i drugih republičkih organa državne uprave i Narodne banke dostave potrebne podatke za obavljanje poslova kontrole.

Član 55.

Domaće lice koje podliježe kontroli obavezno je da ministarstvima i drugim republičkim organima državne uprave i Narodnoj banci koji obavljaju kontrolu omogućiti uvid u poslovanje, stavi na raspolaganje potrebnu dokumentaciju i osigura druge uvjete za obavljanje ovih poslova.

Obaveze iz stava 1. ovog člana odnose se i na domaće pravno lice koje obavlja privrednu djelatnost u inozemstvu.

Član 56.

Ako ministarstva i drugi republički organi državne uprave i Narodna banka utvrde da u poslovanju domaćih i stranih pravnih i fizičkih lica postoje radnje ili djela kažnjiva po zakonu, podnijet će prijavu nadležnom organu.

Ministarstva i drugi republički organi državne uprave mogu izreći zaštitnu mjeru oduzimanja novca i drugih predmeta koji su upotrebljeni ili bili namijenjeni za izvršenje radnje ili djela kažnjivih po zakonu.

Zaštitna mjera iz stava 2. ovog člana izriče se privremeno do odluke suda.

Član 57.

Ako banka obavlja devizno poslovanje suprotno odredbama ove uredbe, Narodna banka može oduzeti odobrenje banci za obavljanje devizno valutnih poslova, platni promet sa inozemstvom i kreditno-garancijskih poslova sa inozemstvom i pokrenuti postupak za brisanje ovog predmeta njenog poslovanja iz sudskog registra.

Ako drugo pravno lice obavlja devizno poslovanje suprotno odredbama ove uredbe, Narodna banka, ministarstva i drugi republički organi državne uprave mogu pokrenuti postupak za brisanje ovog predmeta poslovanja pravnog lica iz sudskog registra.

VIII - IZVJEŠTAVANJE

Član 58.

Pravno lice je obavezno da Narodnoj banci dostavlja izvještaje naročito o:

- 1) kupovini i prodaji deviza i deviznom kursu;
- 2) stanju i prometu na računu u inozemstvu;
- 3) stanju i prometu efektivnog stranog novca;
- 4) stanju i prometu iznošenja dinara u inozemstvo;
- 5) deviznom prilivu i odlivu po osnovu izvoza i uvoza robe i usluga;
- 6) jednostranim transferima;
- 7) kreditnim poslovima sa inozemstvom i

8) kapitalnim ulaganjima.

Podnošenje izvještaja iz stava 1. ovog člana, pravno lice obavlja na način i u rokovima koje propiše Narodna banka.

IX - POSEBNE ODREDBE ZA VRIJEME RATNOG STANJA ILI U SLUČAJU NEPOSREDNE RATNE OPASNOSTI

Član 59.

Devizni kurs utvrđuje Narodna banka.

Član 60.

Banke su obavezne prodati Narodnoj banci 45% efektivnog stranog novca ostvarenog po mjenjačkim poslovima.

Član 61.

Prava i obaveze i poslovi zaključeni u Republici između preduzeća, drugih domaćih pravnih lica i domaćih fizičkih lica, kao i domaćih fizičkih lica sa stranim licem mogu se izražavati i izvršavati u stranim sredstvima plaćanja, pod uvjetima propisanim zakonom.

Izuzetno, uvjete iz stava 1. ovog člana može propisati i Vlada.

Član 62.

Vlada može ograničiti izvoz i iznošenje lomljenog zlata i predmeta od zlata u inozemstvo i ograničiti promet tog zlata u Republici.

X - PRIJELAZNE ODREDBE

Član 63.

Poslovi kupovine i prodaje deviza iz člana 19. ove uredbe, do osnivanja devizne berze, obavljaju se na međubankarskom sastanku.

Član 64.

Do početka rada devizne berze devizni kurs se formira na međubankarskom sastanku koji organizira i vodi Narodna banka.

Član 65.

Radi formiranja stalnih deviznih rezervi kojima rukuje Narodna banka, banke su obavezne prodati Narodnoj banci dio deviznog priliva ostvarenog po osnovu izvoza roba i usluga u iznosu od 25%.

Izuzetno od odredbi stava 1. ovog člana preduzeća koja izvoze investicione radove u inozemstvu dužna su Narodnoj banci prodati 5% svih deviznih priliva.

XI - KAZNENE ODREDBE

Član 66.

Novčanom kaznom od 1.000 do 8.000 DEM u dinarskoj protuvrijednosti po srednjem kursu koji utvrđuje i objavljuje Narodna banka, kaznit će se za privredni prijestup pravno lice:

1) ako prava i obaveze i sve poslove koje glase na novac, a zaključeni su u Republici između preduzeća, drugih domaćih pravnih lica i domaćih fizičkih lica, kao i domaćih fizičkih lica sa stranim licima izražava i plaća u devizama (član 3.);

2) ako kupuje i prodaje devize izvan deviznog tržišta ili obavlja mjenjačke poslove suprotno odredbama čl. 5., 19. i 21. ove uredbe;

3) ako kupuje i prodaje devize i obavlja mjenjačke poslove po deviznom kursu koji se formira van deviznog tržišta (čl. 6., 23. i 64.);

4) ako drži devize na računu u inozemstvu bez odobrenja Narodne banke ili suprotno tom odobrenju (član 11.);

5) ako platni promet sa inozemstvom ne obavlja preko banaka (član 7.) ili na način suprotan odredbama člana 25;

6) ako izvrši prebijanje dugovanja i potraživanja sa inozemstvom bez odobrenja Narodne banke ili suprotno tom odobrenju (član 26. stav 2.);

7) ako ne naplati izvezenu robu i izvršenu uslugu u rokovima propisanim odredbom člana 27;

8) ako plaćenu robu ne uveze odnosno usluge ne realizira u roku od 90 dana od dana kada je banka izvršila nalog za plaćanje prema inozemstvu (član 29. stav 1.);

9) ako obavi plaćanje stranom licu u inozemstvo suprotno odredbi člana 30.;

10) ako plaćanje i naplatu obavi u efektivnom stranom novcu ili u valuti koja se ne može transferirati bez odobrenja Narodne banke ili suprotno tom odobrenju (član 31.);

11) ako obavlja topljenje zlata suprotno odredbi člana 43;

12) ako ne održava likvidnost u plaćanju prema inozemstvu u skladu sa propisom Narodne banke (član 47.); i

13) ako ne proda Narodnoj banci dio deviznog priliva i efektivnog stranog novca u skladu sa odredbama čl. 60. i 65. ove uredbe.

Novčanom kaznom od 20 do 400 DEM u dinarskoj protuvrijednosti po srednjem kursu koji određuje i objavljuje Narodna banka, kaznit će se za privredni prijestup iz stava 1. ovog člana i direktor i drugi radnik sa posebnim ovlaštenjima u pravnom licu.

Član 67.

Novčanom kaznom od 200 do 1.000 DEM u dinarskoj protuvrijednosti po srednjem kursu koji utvrđuje i objavljuje Narodna banka, kaznit će se za prekršaj pravno lice:

1) ako ne kupi naplaćene devize po osnovu izvoza robe i usluga u skladu sa članom 32. stav 1. ove uredbe;

2) ako potraži saldo na tekućem računu ne izmiri u skladu sa članom 33. st. 2. i 3. i članom 34. st. 2. i 3.; i

3) ako ne dostavi o roku izvještaje Narodnoj banci u skladu sa članom 58. ove uredbe.

Novčanom kaznom od 20 do 200 DEM u dinarskoj protuvrijednosti po srednjem kursu koji utvrđuje i objavljuje Narodna banka, kaznit će se za prekršaj iz stava 1. ovog člana i direktor i drugo lice sa posebnim ovlaštenjima u pravnom licu.

Član 68.

Novčanom kaznom od 20 do 200 DEM u dinarskoj protuvrijednosti po srednjem kursu koji utvrđuje i objavljuje Narodna banka, kaznit će se za prekršaj domaće i strano fizičko lice:

1) ako obavlja plaćanje u inozemstvo suprotno odredbama člana 12. stav 1. ovog zakona;

2) ako iznosi dinare iz Republike i unosi dinare u Republiku suprotno propisu Narodne banke (član 48. stav 1.);

3) ako iznosi dinare, vrijednosne papire i vrijednosnice putem poštanskih pošiljki suprotno odobrenju Narodne banke (član 48. stav 2.); i

4) ako iznosi efektivni strani novac, vrijednosne papire i vrijednosnice suprotno propisu Narodne banke (član 49.).

XII - ZAVRŠNE ODREDBE

Član 69.

Propise i druge opće akte čije je donošenje propisano ovom uredbom ovlašćeni organi Republike će donijeti u roku od tri mjeseca od dana stupanja na snagu ove uredbe.

Član 70.

Danom stupanja na snagu ove uredbe prestaje da važi Uredba sa zakonskom snagom o deviznom poslovanju ("Službeni list RBiH", broj 2/92).

Član 71.

Ova uredba stupa na snagu danom objavljivanja u "Službenom listu RBiH".

PR broj /94
5. maja 1994. godine
Sarajevo

Predsjednik
Predsjedništva RBiH,
Alija Izetbegović, s. r.

198

Na osnovu Amandmana LI tačka 5. stav 3. na Ustav Republike Bosne i Hercegovine, Predsjedništvo Republike Bosne i Hercegovine, na prijedlog Vlade Republike Bosne i Hercegovine, donosi

UREDBU SA ZAKONSKOM SNAGOM O NEDEPOZITNIM FINANSIJSKIM ORGANIZACIJAMA

Član 1.

Za obavljanje nedepozitnih finansijskih poslova može se osnovati: investiciono preduzeće, javni i privatni penzioni i drugi fondovi i druge nedepozitne organizacije i finansijski posrednici čiji se poslovi odnose na prikupljanje sredstava, dugoročno ulaganje i finansiranje određenih programa (u daljem tekstu: nedepozitne organizacije).

Član 2.

Investiciono preduzeće je organizacija koja prikuplja sredstva od fizičkih ili pravnih lica emisijom dugoročnih vrijednosnih papira ili na drugi način, radi dugoročnog ulaganja putem tržišta kapitala.

Investiciono preduzeće je i organizacija koja prikuplja sredstva od fizičkih ili pravnih lica radi direktnih ulaganja u preduzeća, s tim da ulog u jedno preduzeće ne može iznositi više od 20% sredstava namijenjenih za dugoročno ulaganje.

Fond kao neprofitnu organizaciju može osnovati društveno-politička zajednica, pravno lice i udruženje građana, radi pribavljanja sredstava i finansiranja ciljeva koji su u skladu sa programom rada fonda i osnivačkim aktima pravnog lica, kao i odlukom društveno-političke zajednice o osnivanju fonda.

Fizičko lice može osnovati fond pod uvjetima da javno objavi program, ciljeve i sredstva fonda, kao i da osigura uvjete za njegovo trajanje od najmanje tri godine.

Preduzeća za finansijski lizing obuhvaćaju poslove finansiranja opreme i drugih trajnih dobara namijenjenih za izdavanje.

Brokери i dileri su pravna lica koje vrše posredovanje u ponudi i tražnji novca i kapitala.

Član 3.

Nedepozitne organizacije vrše i poslove finansijskih usluga koji se odnose na pripremu izdavanja, organizaciju, izdavanje ili distribuciju dugoročnih vrijednosnih papira, i učesće u upravljanju preduzećima u ime i za račun više ulagača.

Član 4.

Na nedepozitne organizacije primjenjuju se odredbe zakona kojim se propisuje osnivanje i poslovanje preduzećima, ako ovom uredbom nije drugačije određeno.

Član 5.

Ugovorom o osnivanju, odlukom ili zakonom o osnivanju reguliraju se osnivački kapital, sticanje statusa osnivača ili člana, način upravljanja i drugi uvjeti i ciljevi poslovanja nedepozitne organizacije.

Uvjeti iz stava 1. ovog člana razrađuju se statutom nedepozitne organizacije.

Član 6.

Investiciono preduzeće može se osnovati samo kao dioničarsko društvo sa najmanje deset dioničara, osim kada u ugovoru o osnivanju ili statutu ima klauzulu da posluje kao neprofitna organizacija.

Član 7.

Strano pravno ili fizičko lice može samostalno ili zajedno sa domaćim pravnim ili fizičkim licem osnovati nedepozitnu organizaciju ili otvoriti predstavništvo ili poslovnu jedinicu u pravilu pod uvjetom reciprociteta, a izuzetno uz saglasnost Vlade Republike Bosne i Hercegovine.

Uvjerjenje o postojanju reciprociteta izdaje Ministarstvo finansija.

Član 8.

Registar nedepozitnih organizacija iz člana 2. ove uredbe vodi se kod Ministarstva finansija.

Ministar finansija donijet će uputstvo o načinu vođenja registra iz stava 1. ovog člana, u roku 30 dana od dana stupanja na snagu ovog zakona.

Član 9.

Odlukom Vlade Republike Bosne i Hercegovine utvrđuju se uvjeti koji se odnose na iznos osnivačkog kapitala, osnivanje,

poslovanje i sredstva rezervi pojedinih oblika organiziranja nedepozitnih organizacija.

Član 10.

Ova uredba stupa na snagu danom objavljivanja u "Službenom listu RBiH".

PR broj 1643/94
5. maja 1994. godine
Sarajevo

Predsjednik
Predsjedništva RBiH,
Alija Izetbegović, s. r.

199

Na osnovu Amandmana LI tačka 5. stav 3. na Ustav Republike Bosne i Hercegovine, Predsjedništvo Republike Bosne i Hercegovine, na prijedlog Vlade Republike Bosne i Hercegovine, donosi

UREDBU SA ZAKONSKOM SNAGOM O AGENCIJI REPUBLIKE BOSNE I HERCEGOVINE ZA OSIGURANJE DEPOZITA I SANACIJU BANAKA

I - OSNOVNE ODREDBE

Član 1.

Agencija Republike Bosne i Hercegovine za osiguranje depozita i sanaciju banaka (u daljem tekstu: Agencija) osniva se kao specijalizirana finansijska organizacija Republike Bosne i Hercegovine (u daljem tekstu: Republika) koja osigurava depozite i sprovodi sanaciju banaka.

Član 2.

Agencija je pravno lice sa pravima i obavezama propisanim ovom uredbom.

Sjedište Agencije je u Sarajevu.

Član 3.

Sredstva potrebna za početak rada Agencije osiguravaju se u republičkom budžetu.

Sredstva za ostvarivanje funkcija Agencije su: premije koje banke plaćaju Agenciji na ime osiguranja depozita, sredstva koja Agencija ostvari svojim poslovanjem, emisija obveznica, sredstva iz republičkog budžeta i druga sredstva.

Član 4.

Agencija se zadužuje i izdaje obveznice.

Do godinu dana Agencija se zadužuje samostalno.

Na osnovu odluke Skupštine Republike Bosne i Hercegovine, Agencija izdaje obveznice i zadužuje se na vrijeme duže od godinu dana.

Član 5.

U slučaju privremenog nedostatka sredstava potrebnih za rad Agencije, Narodna banka Bosne i Hercegovine (u daljem tekstu: Narodna banka) može Agenciji odobriti kratkoročni kredit pod uvjetima i na način koji se utvrde ugovorom između Narodne banke i Agencije.

II - POSLOVANJE AGENCIJE

1. Osiguranje depozita

Član 6.

Banka osigurava svoje depozite kod Agencije pod uvjetima i na način utvrđen ovom uredbom.

Agencija osigurava depozite banaka.

Narodna banka utvrđuje vrstu i iznos depozita banke iz stava 1: ovog člana koje je banka obavezna osigurati kod Agencije.

Agencija je dužna da u slučaju privremene tekuće nelikvidnosti ili stečaja banke isplati osigurane depozite.

Isplatu iz stava 4. ovog člana Agencija vrši neposredno deponentima banke na njihov zahtjev ili preko banke koja preuzima depozite banke koja se nalazi u stečaju.

Član 7.

Na osigurane depozite banka plaća Agenciji premiju osiguranja koja predstavlja određeni procenat osiguranih depozita.

Višinu premije iz stava 1. ovog člana i rokove njene uplate utvrđuje Agencija.

O osiguranju depozita zaključuje se ugovor.

2. Sanacija banaka

Član 8.

U postupku sanacije Agencija obavlja slijedeće poslove:

- 1) privremeno ili trajno kupuje potencijalne gubitke;
- 2) preuzima potencijalne gubitke zajedno sa odgovarajućim dijelom pasive;

- 3) upravlja kupljenim potencijalnim gubicima;
- 4) upravlja potencijalnim gubicima koje je preuzela od banke u sanaciji zajedno sa odgovarajućim dijelom pasive;
- 5) prodaje trajno kupljene potencijalne gubitke, odnosno potencijalne gubitke koje je preuzela zajedno sa odgovarajućim dijelom pasive;

- 6) daje kredite banci u sanaciji, odnosno banci koja je preuzela banku u sanaciji;

- 7) kupuje dionice banke u sanaciji;

- 8) upravlja bankom po osnovu kupljenih dionica;

- 9) organizira prodaju dionica, odnosno uloga banke u sanaciji;

- 10) organizira preuzimanje banke u sanaciji od stranke banke navedene u odluci Agencije o sanaciji banke;

- 11) daje druge oblike podrške u procesu sanacije banke.

Član 9.

Agencija ostvaruje pravo na upravljanje i pravo na učešće u dobiti banke u sanaciji, srazmjerno svom dioničkom kapitalu odnosno ulogu.

Član 10.

Kada od banke u sanaciji preuzme ili kupi potencijalne gubitke zajedno sa odgovarajućim dijelom pasive, Agencija obavještava o tome dužnike, odnosno povjerioce po preuzetim potencijalnim gubicima, odnosno pasivi.

Preuzetim potencijalnim gubicima i odgovarajućim dijelom pasive banke u sanaciji, Agencija upravlja u svoje ime i za svoj račun.

Agencija preduzima akte i radnje potrebne za naplatu i prodaju preuzetih potencijalnih gubitaka zajedno sa odgovarajućim dijelom pasive, uključujući i akte i radnje pred pravosudnim organima. Sredstva ostvarena naplatom potencijalnih gubitaka i njihovom prodajom, Agencija koristi za izmirenje povjerilaca banke po preuzetom dijelu pasive.

Agencija je dužna da otpisuje dospjela nenaplaćena potraživanja iz preuzetih potencijalnih gubitaka na teret svojih sredstava i da izmiruje dugovanja iz preuzete pasive banke.

Član 11.

Kada od banke u sanaciji trajno ili terminski kupi potencijalne gubitke, Agencija o tome obavještava dužnike.

Trajno kupljenim potencijalnim gubicima banke u sanaciji, Agencija upravlja u svoje ime i za svoj račun, a terminski kupljenim gubicima u svoje ime i za račun banke u sanaciji.

Agencija je dužna da preduzme sve akte i radnje potrebne za naplatu i prodaju kupljenih potencijalnih gubitaka, uključujući i akte i radnje pred pravosudnim organima.

Sredstva ostvarena naplatom i prodajom trajno kupljenih potencijalnih gubitaka predstavljaju sredstva Agencije, a sredstva ostvarena naplatom i prodajom privremeno kupljenih potencijalnih gubitaka predstavljaju sredstva banke u sanaciji.

Banka u sanaciji je dužna da za iznos primljenih sredstava, u smislu stava 4. ovog člana, vrati Agenciji odgovarajući iznos obveznica.

Agencija je dužna da otpisuje dospjela nenaplaćena potraživanja iz trajno kupljenih potencijalnih gubitaka na teret svojih sredstava. Ukoliko je kupovina bila privremena, po isteku roka na koji je kupovina bila ugovorena, Agencija vraća banci preostale nenaplaćene potencijalne gubitke i povlači iz date obveznice.

Član 12.

Ukoliko se ne prodaju sve ili određeni broj dionica banke u sanaciji utvrđene odlukom Agencije, ona o tome obavještava Narodnu banku i Ministarstvo finansija.

3. Kontrola poslovanja Agencije

Član 13.

Kontrolu poslovanja Agencije vrši Narodna banka.

III - ORGANIZACIJA I UPRAVLJANJE AGENCIJOM

Član 14.

Organ upravljanja Agencijom je upravni odbor Agencije koji se sastoji od predsjednika i šest članova.

Predsjednik i tri člana upravnog odbora Agencije imenuje Vlada Republike Bosne i Hercegovine (u daljem tekstu: Vlada) na prijedlog Narodne banke, a tri člana imenuje Narodna banka.

Član 15.

Nadzorni odbor Agencije je organ nadzora koji ima predsjednika i najmanje dva člana.

Nadzorni odbor prati i kontrolira poslovanje Agencije, upravnog odbora i direktora Agencije i o tome podnosi izvještaje Narodnoj banci.

Za predsjednika i člana nadzornog odbora ne mogu biti imenovani predsjednik i članovi upravnog odbora ili direktor Agencije.

U slučaju nesavjesnog rada ili prekršaja svoje dužnosti od predsjednika i članova nadzornog odbora Agencija može tražiti naknadu štete.

Član 16.

Agencija ima direktora koji odgovara za zakonitost rada Agencije.

Direktora Agencije postavlja Vlada na prijedlog Narodne banke.

Član 17.

Agencija, najmanje jednom godišnje, podnosi izvještaj o svom radu Vladi i Narodnoj banci.

Član 18.

Upravni i nadzorni odbor i direktor Agencije odgovorni su za svoj rad Vladi i Narodnoj banci.

Član 19.

Agencija ima statut, koji potvrđuje Vlada.

Statutom se utvrđuje naročito:

- 1) ciljevi, organizacija i način poslovanja Agencije;
- 2) nadležnost upravnog i nadzornog odbora;
- 3) obaveze i prava direktora i radnika koji obavljaju poslove i zadatke sa posebnim ovlaštenjima;
- 4) mandat predsjednika i članova upravnog odbora, direktora i radnika sa posebnim ovlaštenjima;
- 5) ovlaštenja za zastupanje i potpisivanje;
- 6) druga organizaciona pitanja iz poslovanja.

Član 20.

Agencija je dužna da do kraja tekuće godine donese finansijski plan za narednu godinu i do kraja prvog tromjesečja naredne godine godišnji obračun za prethodnu godinu.

Izuzetno, ukoliko se finansijski plan ne donese u roku iz stava 1. ovog člana, donosi se odluka o privremenom finansiranju Agencije.

Godišnji obračun i finansijski plan, odnosno odluku o privremenom finansiranju Agencije, donosi upravni odbor Agencije, a potvrđuje ih Vlada.

Član 21.

Organizacija ovlašćena za obavljanje poslova revizije vrši svake godine ekonomsko-finansijsku reviziju godišnjeg obračuna Agencije.

Izvještaj o izvršenoj ekonomsko-finansijskoj reviziji godišnjeg obračuna Agencija dostavlja Vladi i Narodnoj banci.

IV - ZAVRŠNE ODREDBE

Član 22.

Vlada Republike Bosne i Hercegovine preduzet će mjere i radnje potrebne za osnivanje i početak rada Agencije u roku od šest mjeseci od dana stupanja na snagu ove uredbe.

Do osnivanja Agencije poslove osiguranja depozita obavlja Narodna banka u ime i za račun Republike.

Član 23.

Ova uredba stupa na snagu danom objavljivanja u "Službenom listu RBiH".

PR broj 1644/94
5. maja 1994. godine
Sarajevo

Predsjednik
Predsjedništva RBiH,
Alija Izetbegović, s. r.

200

Na osnovu Amandmana LI tačka 5. stav 3. na Ustav Republike Bosne i Hercegovine, Predsjedništvo Republike Bosne i Hercegovine, na prijedlog Vlade Republike Bosne i Hercegovine, donosi

UREDBU SA ZAKONSKOM SNAGOM O PRIVREMENIM MJERAMA ORGANIZIRANJA ODREĐENIH PREDUZEĆA I DRUGIH PRAVNIH LICA

Član 1.

Privremene mjere za vrijeme ratnog stanja mogu se preduzimati u organiziranju određenih preduzeća, njihovih oblika povezivanja, banaka i drugih finansijskih organizacija i drugih pravnih lica (u daljem tekstu: pravno lice) čija je djelatnost utvrđena od posebnog značaja za odbranu Republike Bosne i Hercegovine (u daljem tekstu: Republika).

Mjere iz stava 1. ovog člana određuje nadležno ministarstvo.

Privremene mjere iz stava 1. ovog člana nemaju pravno dejstvo na svojinske odnose pravnih lica u društvenoj svojini, a niti pravnih lica u mješovitoj svojini, koja su nastala iz društvenih preduzeća upisom i otkupom internih dionica po Zakonu o društvenom kapitalu ("Službeni list RBiH", broj 2/92).

Prava i obaveze dioničara, odnosno ulagača i preduzeća po Zakonu iz stava 3. ovog člana za vrijeme ratnog stanja miruju.

Član 2.

Privremene mjere u smislu člana 1. ove uredbe podrazumijevaju:

1. imenovanje predsjednika i članova privremenog organa upravljanja i vršioca dužnosti poslovnog organa pravnog lica;

2. promjene u organiziranju pravnih lica.

Promjene u organiziranju pravnog lica u smislu stava 1. tačke 2. ovog člana mogu se izvršiti:

1. spajanjem dva ili više pravnih lica ili njihovih oblika povezivanja u novi subjekt - preduzeće;

2. pripajanjem jednog ili više pravnih lica drugom pravnom licu, odnosno razdvajanjem jednog pravnog lica u više pravnih subjekata;

3. osnivanjem novog pravnog lica od strane dva ili više postojećih pravnih lica radi obavljanja određenih djelatnosti od zajedničkog interesa, a koje se ne obavljaju ili se nadalje neće obavljati u pravnim licima koja osnivaju novo pravno lice;

4. obavljanjem određenih djelatnosti od zajedničkog interesa za dva ili više pravnih lica u jednom od tih pravnih lica uz isključenja vršenja istih djelatnosti u drugim pravnim licima.

Član 3.

U slučaju iz člana 2. tač. 3. i 4. ove uredbe, pravno lice koje obavlja djelatnosti od zajedničkog interesa za dva ili više pravnih lica, vodi poslovne evidencije koje se odnose na te djelatnosti i odvojeno za svako pravno lice za čiji račun obavlja djelatnosti.

Član 4.

U slučajevima iz člana 2. stav 2. tač. 3. i 4. ove uredbe, novoosnovano pravno lice, odnosno pravno lice koje obavlja određene djelatnosti od zajedničkog interesa za dva ili više pravnih lica, istupa u pravnom prometu u svoje ime, a za račun pravnog lica na čije poslovanje se odnosi svaki pojedini posao.

Član 5.

Pravno lice nastalo promjenama u organiziranju po odredbama člana 2. stav 2. tač. 1. i 2. ove uredbe nosilac je prava i obaveza koja nastanu u toku njegovog poslovanja.

Pravno lice nastalo promjenama u organiziranju po odredbama člana 2. stav 2. tač. 3. i 4. ove uredbe preuzima obaveze za račun pravnog lica za koje je posao zaključilo.

Član 6.

Nadležno ministarstvo prilikom donošenja rješenja o promjenama u organiziranju pravnog lica iz člana 1. ove uredbe određuje način reorganiziranja pravnog lica u smislu člana 2. ove uredbe.

Nadležno ministarstvo donosi rješenje, iz čl. 1. i 2. ove uredbe, uz prethodnu saglasnost Ministarstva odbrane.

Član 7.

Rješenje o promjenama u organiziranju pravnog lica sadrži naročito: koja se pravna lica organizuju, način reorganizacije (spajanje, pripajanje, razdvajanje, osnivanje novog pravnog lica), privremeni organ upravljanja i vršilac dužnosti direktora pravnog lica, status radnika u slučaju osnivanja novog pravnog lica, odnosno povjeravanja određenih djelatnosti drugom pravnom licu.

Kada se promjenama u organiziranju, određene djelatnosti povjeravaju jednom od pravnih lica ili novoosnovanom pravnom licu, kod ostalih pravnih lica, na osnovu rješenja iz stava 1. ovog člana, brišu se identične djelatnosti iz sudskog registra.

Rješenje o promjenama u organiziranju sadrži i obavezu sastavljanja bilansa stanja za svako pravno lice koje se reorganizira.

Član 8.

Pravno lice, iz člana 2. ove uredbe, dužno je izvršavati planove i programe rada te druge postavljene zadatke za vrijeme ratnog stanja i o tome izvještavati nadležno ministarstvo svaka tri mjeseca.

Ukoliko pravno lice ne izvršava zadatke iz stava 1. ovog člana, nadležno ministarstvo može izmijeniti rješenje iz člana 7. ove uredbe.

Član 9.

Promjene u organiziranju izvršene, po odredbama ove uredbe, mogu prestati rješenjem nadležnog ministarstva ukoliko će se prvobitnom organizacijom poslovanja postizati bolji poslovni efekti u pravnom licu.

Donošenjem rješenja iz stava 1. ovog člana organ upravljanja će u roku od tri mjeseca izvršiti raspored rezultata poslovanja pravnog lica.

Raspodjela rezultata poslovanja izvršit će se po principu proporcionalnog angažiranja sredstava i radnika svakog subjekta u pravnom licu u kojem su izvršene promjene u organiziranju.

Član 10.

Nadležna ministarstva redovno će informirati Vladu Republike Bosne i Hercegovine o provođenju zadataka koja su data pravnim licima iz člana 2. ove uredbe.

Član 11.

Odredbe ove uredbe ne odnose se na pravna lica čiji je osnivač Republika.

Član 12.

Ova uredba stupa na snagu danom objavljivanja u "Službenom listu RBiH".

Broj 1645/94
5. maja 1994. godine
Sarajevo

Predsjednik
Predsjedništva RBiH,
Alija Izetbegović, s. r.

201

Na osnovu Amandmana LI tačka 5. stav 3. na Ustav Republike Bosne i Hercegovine, Predsjedništvo Republike Bosne i Hercegovine, na prijedlog Vlade Republike Bosne i Hercegovine, donosi

UREDBU SA ZAKONSKOM SNAGOM O KONTROLI CIJENA

Član 1.

Ovom uredbom uređuje se kontrola cijena proizvoda i usluga na jedinstvenom tržištu Republike Bosne i Hercegovine (u daljem tekstu: Republika) i utvrđuju prava i obaveze organa društveno-političkih zajednica u vršenju kontrole cijena.

Član 2.

Preduzeća i druge pravne i fizičke osobe, učesnici u proizvodnji, prometu i vršenju usluga (u daljem tekstu: preduzeća) formiraju cijene slobodno, prema uvjetima tržišta.

Pri formiranju cijena, prema uvjetima tržišta, preduzeće kao i njihovi oblici organiziranja odnosno udruživanja ne smiju se dogovarati odnosno utvrđivati cijene istih proizvoda i usluga, koristiti monopolski položaj niti druga preduzeća dovoditi u neravnopravan položaj.

Preduzeća su dužna donijeti akt o slobodnom formiranju cijena odnosno utvrditi i na vidnom mjestu istaknuti pojedinačnu cijenu ili cjenovnik proizvoda i usluga.

Član 3.

Pod kontrolom cijena podrazumijeva se aktivnost organa društveno-političke zajednice na stvaranju stabilnih odnosa na tržištu koji omogućava preduzećima da formiraju cijene proizvoda i usluga prema uvjetima tržišta i praćenje kretanja cijena i odnosa cijena.

Organi društveno-političkih zajednica pored aktivnosti iz stava 1. ovog člana propisuju zaštitne cijene za pojedine poljoprivredne proizvode i mjere neposredne zaštite.

Član 4.

Vlada Republike Bosne i Hercegovine (u daljem tekstu: Vlada) utvrđuje poljoprivredne proizvode za koje se propisuju zaštitne cijene i visinu tih cijena u skladu sa aktima Skupštine Republike Bosne i Hercegovine kojima se utvrđuje razvojna politika.

Član 5.

Ako se poduzetim mjerama iz člana 3. stav 1. ove uredbe ne mogu osigurati stabilni odnosi na tržištu, nadležni organ društveno-političke zajednice propisat će jednu od mjera neposredne kontrole cijena.

Član 6.

Kao mjera neposredne kontrole cijena mogu se, za pojedine proizvode i usluge, propisati:

- način formiranja cijena;
- najviši nivo cijene odnosno najviše cijene;
- zadržavanje odnosno vraćanje cijena na određeni nivo;
- davanje saglasnosti na cijene odnosno tarife za određene proizvode i usluge;
- dostavljanje obavijesti o cijenama proizvoda i usluga, radi evidentiranja odnosno ovjere.

Mjere neposredne kontrole cijene zasnivaju se, po pravilu, na ekonomskim kriterijumima.

Član 7.

Organ društveno-političke zajednice koji je propisao mjeru neposredne kontrole cijena dužan je da poduzme i mjere kojima se otklanjaju uzroci zbog kojih je mjera propisana.

Mjera neposredne kontrole cijena može trajati dok se ne poboljša stanje na tržištu, s tim što je organ društveno-političke zajednice koji je propisao mjeru, dužan, svakih šest mjeseci, da preispita postojanje razloga za zadržavanje propisanih mjera.

Član 8.

Mjere neposredne kontrole cijena svih proizvoda i usluga od interesa za Republiku propisuje Vlada.

Zahtjev za promjenom cijena proizvoda i usluga za koje je propisana mjera neposredne kontrole cijena, preduzeća podnose Vladi sa odgovarajućom dokumentacijom, putem ministarstva nadležnog za poslove privrede i cijena.

Pri propisivanju mjera neposredne kontrole cijena iz stava 1. ovog člana, kao i mjere iz člana 4. ove uredbe Vlada će o tome obavijestiti Skupštinu Republike Bosne i Hercegovine, u roku od petnaest dana od dana propisivanja te mjere.

Član 9.

Kao proizvodi i usluge od interesa za Republiku, u smislu ove uredbe, su svi proizvodi i usluge, osim proizvoda i usluga od interesa za društveno-političke zajednice, i to:

- za okrug: sve vrste hljeba od brašna žitarica (osim peciva i posebnih vrsta pekarskih proizvoda), tjestenine, mlijeko i proizvodi prerade mlijeka, meso i proizvode prerade mesa, građevinski materijali (osim cementa), proizvodi grafičke industrije, cijene lokalnih novina i morskog, jezerskog i riječnog saobraćaja;

- za općinu odnosno grad Sarajevo: sve vrste zanatskih i osobnih usluga, stambeno-komunalna djelatnost uključujući i stambenu izgradnju i uređenje naselja i prostora, prijevoz putnika i robe u gradskom i prigradskom saobraćaju, usluge autobuskih stanica, pretovarne usluge i usluge javnih skladišta, tržnica i pijaca na malo, usluge obrazovanja i odgoja (obdaništa i sl.), izrade lijekova u apotekama, grafičke usluge, pecivo i posebni pekarski proizvodi i ugostiteljsko turističke usluge.

Nadležni organi društveno-političkih zajednica iz stava 1. ovog člana pri propisivanju mjera neposredne kontrole cijena za proizvode i usluge iz stava 1. ovog člana, dužni su obavijestiti skupštinu društveno-političke zajednice, u roku od petnaest dana od dana propisivanja mjere.

Član 10.

Ako dode, ili može doći, do značajnih poremećaja na tržištu i u kretanju cijena Vlada može poduzeti mjere u oblasti cijena i za proizvode i usluge koje su u nadležnosti drugih društveno-političkih zajednica ili utvrditi da postoje uvjeti za propisivanje mjera neposredne kontrole cijena određenih proizvoda i usluga i bliže odrediti uvjete za propisivanje tih mjera od strane nadležnih organa tih društveno-političkih zajednica.

Član 11.

Organi uprave nadležni za poslove cijena, svaki u okviru svoje nadležnosti, određuju proizvode i usluge za koje su preduzeća dužna dostavljati obavijest o cijenama radi praćenja, odnosno ovjere i podatke koje mora obavijest o cijenama sadržati, te rokove i način dostave tih podataka.

Ovlašćuje se ministar nadležan za poslove privrede i cijena da donese uputstvo o načinu, sadržaju i rokovima dostave obavijesti iz stava 1. ovog člana u roku od petnaest dana od dana stupanja na snagu ove uredbe.

Oredbe iz st. 1. i 2. ovog člana odnose se na proizvode i usluge za koje je propisana mjera neposredne kontrole cijena i na cijene koje se slobodno formiraju prema uvjetima tržišta.

Član 12.

Kada je mjera neposredne kontrole cijena propisana za robu proizvedenu u Republici, ta mjera se primjenjuje i na cijene takve robe iz uvoza, ako propisom kojim je mjera određena nije drugačije predviđeno.

Za proizvode čije se cijene slobodno formiraju u proizvodnji ne mogu se, po pravilu, propisivati mjere neposredne kontrole cijena u preradi i prometu.

Za proizvode za koje je propisana mjera neposredne kontrole cijena u proizvodnji, propisuje se, po pravilu, i odgovarajuća mjera neposredne kontrole cijena u preradi i prometu.

Ako je mjera neposredne kontrole cijena propisana za proizvode krajnje potrošnje, propisuje se, po pravilu, odgovarajuća mjera neposredne kontrole cijena u preradi i prometu.

Član 13.

Cijena novih proizvoda - asortimana i usluga za koje je propisana neposredna kontrola cijena mogu se formirati prema nivou sličnih ili srodnih proizvoda odnosno usluga.

Član 14.

Organi uprave nadležni za poslove cijena prate i analiziraju kretanje cijena, djelovanje mjera neposredne kontrole cijena na visine i odnose cijena, provođenje propisa kojima se uređuju odnosi u oblasti cijena, prate i analiziraju utjecaj cijena na odnose u stjecanju i raspodjeli dobiti u privredi, pojedinim oblastima, organima i grupacijama, prate i analiziraju utjecaj kretanja cijena na stabilnost tržišta, troškove života, prate kretanje svjetskih cijena (uvoznih, izvoznih, berzanskih i domaćih), predlažu mjere neposredne kontrole cijena, te obavljaju i druge stručne poslove u oblasti cijena.

Član 15.

Odredbe ove uredbe ne odnose se na kontrolu cijena naružanja i vojne opreme i drugih proizvoda i usluga za koje je kontrola cijena utvrđena posebnim republičkim propisima.

Član 16.

Kontrolu nad primjenom ove uredbe vrši tržišna inspekcija.

Član 17.

Ako inspektor vršenjem kontrole utvrdi da se preduzeće u radu ne pridržava dobrih poslovnih običaja i poslovnog morala dostaviće podatke o tome nadležnoj privrednoj komori radi pokretanja odgovarajućeg postupka.

Član 18.

Ako je inspektor podnio prijavu za krivično djelo ili privredni prijestup za koji je ovom uredbom predviđena zaštitna mjera, inspektor može donijeti rješenje kojim će sporna sredstva privremeno imobilisati stavljanjem stečene imovinske koristi na izdvojeni račun kod nadležne Službe društvenog knjigovodstva.

O upravnoj mjeri iz stava 1. ovog člana inspektor je dužan odmah obavijestiti organ nadležan za vođenje postupka, a svoje rješenje dostavlja na izvršenje Službi društvenog knjigovodstva.

Član 19.

Ako odgovorna osoba u preduzeću predloži nadležnom organu preduzeća da donese ili sama donese akt, odnosno formira cijene suprotno propisu o mjerama neposredne kontrole cijena ili ne izvrši rješenje kojim je naređeno otklanjanje utvrđene nepravilnosti ili nezakonitosti, kaznit će se za krivično djelo kaznom zatvora od jedne do pet godina.

Član 20.

Za privredni prijestup kaznit će se preduzeće novčanom kaznom u iznosu pesterostrog do dvadesetostrog iznosa cijene zaračunate iznad propisanih cijena proizvoda i usluga za koje su propisane mjere neposredne kontrole cijena (član 6.).

Za radnju iz stava 1. ovog člana kaznit će se za privredni prijestup odgovorna osoba u preduzeću novčanom kaznom od 200.000 do 2,5 miliona dinara.

Za privredni prijestup iz stava 1. ovog člana pored novčane kazne izvršit će se i zaštitna mjera oduzimanja imovinske koristi pribavljene izvršenjem privrednog prijestupa.

Član 21.

Novčanom kaznom od 1 milion do 50 miliona dinara kaznit će se za privredni prijestup preduzeće ako pri formiranju cijene proizvoda i usluga koristi monopolski položaj, dovodi druga preduzeća u neravnotežan položaj ili sa drugim preduzećima dogovara i utvrđuje cijene istih proizvoda i usluga (član 2. stav 2.).

Za radnju iz stava 1. ovog člana kaznit će se i odgovorna osoba novčanom kaznom od 200.000 do 2,5 miliona dinara.

Član 22.

Novčanom kaznom od 1,5 miliona do 10 miliona dinara kaznit će se za privredni prijestup preduzeće ako se pri kupovini proizvoda ne pridržava propisane zaštitne cijene (član 4.).

Za radnju iz stava 1. ovog člana kaznit će se i odgovorna osoba novčanom kaznom od 200.000 do 1,5 miliona dinara.

Član 23.

Novčanom kaznom od 100.000 do 6 miliona dinara kaznit će se za prekršaj preduzeće:

- ako se ne pridržava akta o formiranju cijena ili istaknutog cjenovnika (član 2. stav 3);

- ako nadležnom organu u određenom roku ne dostavi cjenovnik proizvoda i usluga i ako cjenovnik ne sadrži propisane podatke (član 11);

- ako cijene novih proizvoda i usluga formira suprotno odredbi člana 13.

Za prekršaj iz stava 1. ovog člana kaznit će se i odgovorna osoba novčanom kaznom od 50.000 - 1.250.000 dinara.

Član 24.

Uz kaznu za privredni prijestup iz člana 2. stav 2. i člana 6. za prekršaj iz člana 13. ove uredbe mogu se izreći zaštitne mjere:

1. zabrana preduzeću da se bavi određenom djelatnošću u trajanju do jedne godine;

2. zabrana odgovornoj osobi da vrši određene dužnosti u trajanju do tri godine;

3. oduzimanje proizvoda koji se nalaze u prodaji, po cijena višim od dozvoljenih.

U poveljenom slučaju, zaštitne mjere iz stava 1. tač. 1. i 2. ovog člana izreći će se u trajanju od jedne do pet godina.

Član 25.

Danom stupanja na snagu ove uredbe prestaje primjena:

- Zakona o sistemu društvene kontrole cijena ("Službeni list RBiH", broj 2/92);

- Zakona o društvenoj kontroli cijena ("Službeni list RBiH", broj 29/90) i

- Uredbe o načinu formiranja cijena određenih proizvoda i usluga ("Službeni list RBiH", br. 4/92, 5/92, 7/92 i "Službeni list RBiH", broj 1/92), osim odredaba čl. 2. i 4.

Član 26.

*Ova uredba stupa na snagu danom objavljivanja u "Službenom listu RBiH".

PR broj 1646/94

5. maja 1994. godine

Sarajevo

Predsjednik

Predsjedništva RBiH,

Alija Izetbegović, s. r.

202

Na osnovu Amandmana LI tačka 5. st. 3. i 4. na Ustav Republike Bosne i Hercegovine, Predsjedništvo Republike Bosne i Hercegovine, na sjednici od 5. maja 1994. godine, donijelo je

UREDBU SA ZAKONSKOM SNAGOM

O OBUSTAVI OD PRIMJENE STAVA 9. TAČKE 4.

AMANDMANA LI NA USTAV REPUBLIKE BOSNE I HERCEGOVINE

Član 1.

Za vrijeme ratnog stanja stav 9. tačke 4. Amandmana LI na Ustav Republike Bosne i Hercegovine, obustavlja se od primjene.

Član 2.

Ova uredba stupa na snagu danom objavljivanja u "Službenom listu RBiH".

PR broj 1647/94

5. maja 1994. godine

Sarajevo

Predsjednik

Predsjedništva RBiH,

Alija Izetbegović, s. r.

203

Na osnovu Amandmana LI tačka 5. stav 3. na Ustav Republike Bosne i Hercegovine, Predsjedništvo Republike Bosne i Hercegovine, na sjednici od 26. aprila 1994. godine, donijelo je

ODLUKU**O RAZRJEŠENJU I IZBORU PREDSEDNIKA I
SUDIJA REDOVNIH SUDOVA****I**

Razrješavaju se dužnosti sudije Vrhovnog suda Bosne i Hercegovine GORJANA TANOVIĆ i OLGA DEGAN, radi samovoljnog napuštanja dužnosti i nedolaska na posao.

II

Razrješavaju se dužnosti sudije Višeg suda u Mostaru dr SUZANA BUBIĆ i JASNA BAJRAMOVIĆ na lični zahtjev, radi odlaska na drugu dužnost.

III

Razrješavaju se dužnosti sudije Osnovnog suda II u Sarajevu:

- JASNA VIDOVIĆ, radi samovoljnog napuštanja dužnosti i nedolaska na posao,
- MIODRAG ZOTOVIĆ, radi samovoljnog napuštanja dužnosti i nedolaska na posao,
- BILJANA POTPARIĆ, radi samovoljnog napuštanja dužnosti i nedolaska na posao,
- DAVOR ŽILIĆ, na lični zahtjev,
- ARMA VAGNER-POPOVIĆ, radi samovoljnog napuštanja dužnosti i nedolaska na posao,
- VESNA TRIFUNOVIĆ, radi samovoljnog napuštanja dužnosti i nedolaska na posao.

IV

Razrješavaju se dužnosti sudije Osnovnog suda u Travniku:
-SLAVKO VUKIĆ, na lični zahtjev,
-ŽELJKO PERČINLIĆ, radi samovoljnog napuštanja dužnosti i nedolaska na posao.

V

Razrješava se dužnosti sudije Osnovnog suda u Brčkom ZIJAD KADRIĆ, radi odlaska na drugu dužnost.

VI

Za predsjednika Osnovnog suda u Brčkom bira se ZIJAD KADRIĆ, dosadašnji sudija Osnovnog suda u Brčkom.

VII

Za sudiju Osnovnog suda u Brčkom bira se EMINA MUHAHALILOVIĆ, dosadašnji rukovodilac za pravne i kadrovske poslove DD "Univerzal" u Brčkom.

VIII

Ovu odluku objaviti u "Službenom listu RBiH".

Broj 02-111-312/94
26. aprila 1994. godine
Sarajevo

Predsjednik
Predsjedništva RBiH,
Alija Izetbegović, s. r.

204

Na osnovu Amandmana LI tačka 5. stav 3. na Ustav Republike Bosne i Hercegovine, Predsjedništvo Republike Bosne i Hercegovine, na sjednici od 26. aprila 1994. godine, donijelo je

ODLUKU**O RAZRJEŠENJU I IMENOVANJU
JAVNIH TUŽILACA****I**

Razrješava se dužnosti zamjenika osnovnog javnog tužioca u Zenici VESNA KAKNJO, na lični zahtjev radi odlaska na drugu dužnost.

II

Razrješava se dužnosti zamjenika osnovnog javnog tužioca u Tuzli ALIJA ŠUKALIĆ, radi odlaska na drugu dužnost.

III

Za zamjenika višeg javnog tužioca u Tuzli imenuje se ALIJA ŠUKALIĆ, dosadašnji zamjenik osnovnog javnog tužioca u Tuzli.

IV

Za osnovnog javnog tužioca u Tuzli imenuje se AJNA DEMIROVIĆ, dosadašnji pomoćnik sekretara Opštinskog sekretarijata za opštinsku upravu opštine Tuzla.

V

Ovu odluku objaviti u "Službenom listu RBiH".

Broj 02-111-313/94
26. aprila 1994. godine
Sarajevo

Predsjednik
Predsjedništva RBiH,
Alija Izetbegović, s. r.

205

Na osnovu čl. 2. i 16. Zakona o pomilovanju ("Službeni list RBiH", broj 17/77 i "Službeni list RBiH", broj 6/92) i člana 49. stav 2. Poslovnika Predsjedništva Republike Bosne i Hercegovine, Predsjedništvo Republike Bosne i Hercegovine, na sjednici od 26. aprila 1994. godine, donijelo je

ODLUKU**O ABOLICIJI PO SLUŽBENOJ DUŽNOSTI****I**

Oslobadaju se od daljeg krivičnog gonjenja odnosno daljeg izvršenja kazne zatvora, u cilju razmjene za lica zarobljena od strane agresora:

1. SUBAŠIĆ STJEPAN
2. BEUS ANTONIJE
3. PETROVIĆ ŽELJKO
4. BILETIĆ ALOJZIJE
5. STOJČIĆ IVO
6. TADIĆ VLADO
7. NEMET BERISLAV
8. NEMET KRUNISLAV
9. DILBER ŽELJKO
10. BAGARIĆ JAKOV
11. ŠEPETA VC DAVOR
12. ŠEPETA VC SRDAN
13. ČOLO BRUNO

II

Odluku će provesti Državna komisija za razmjenu ratnih zarobljenika.

III

Odluku objaviti u "Službenom listu RBiH"

Broj 02-248-315/94
26. aprila 1994. godine
Sarajevo

Predsjednik
Predsjedništva RBiH,
Alija Izetbegović, s. r.

206

Na osnovu člana 15. Uredbe sa zakonskom snagom o vršenju inostranih poslova ("Službeni list RBiH", broj 18/92), na prijedlog Vlade Republike Bosne i Hercegovine, Predsjedništvo Republike Bosne i Hercegovine, na sjednici od 26. aprila 1994. godine, donijelo je

ODLUKU**O POSTAVLJENJU AMBASADORA REPUBLIKE
BOSNE I HERCEGOVINE U ŠVEDSKOJ****I**

Za ambasadora Republike Bosne i Hercegovine u Švedskoj, sa sjedištem u Štokholmu, postavlja se IZET SERDAREVIC.

II

Ovu odluku objaviti u "Službenom listu RBiH".

Broj 02-111-317/94
26. aprila 1994. godine
Sarajevo

Predsjednik
Predsjedništva RBiH,
Alija Izetbegović, s. r.

207

Na osnovu člana 15. Uredbe sa zakonskom snagom o vršenju inostranih poslova ("Službeni list RBiH", broj 18/92), na prijedlog Vlade Republike Bosne i Hercegovine, Predsjedništvo Republike Bosne i Hercegovine, na sjednici od 26. aprila 1994. godine, donijelo je

ODLUKU

O POSTAVLJENJU AMBASADORA REPUBLIKE BOSNE I HERCEGOVINE U SJEDINJENIM AMERIČKIM DRŽAVAMA

I

Za ambasadora Republike Bosne i Hercegovine u Sjedinjenim Američkim Državama, sa sjedištem u Vašingtonu, postavlja se ALKALAJ SVEN.

II

Ovu odluku objaviti u "Službenom listu RBiH".

Broj 02-111-318/94
26. aprila 1994. godine
Sarajevo

Predsjednik
Predsjedništva RBiH,
Alija Izetbegović, s. r.

208

Na osnovu Amandmana LI tačka 5. stav 3. na Ustav Republike Bosne i Hercegovine, Predsjedništvo Republike Bosne i Hercegovine, na sjednici od 26. aprila 1994. godine, donijelo je

ODLUKU

O RAZRJEŠENJU SUDIJE VIŠEG SUDA ZA PREKRŠAJE U SARAJEVU

I

Razrješava se dužnosti sudije Višeg suda za prekršaje u Sarajevu VELIDA RUSTANBEGOVIĆ, na lični zahtjev, sa 8. aprilom 1994. godine.

II

Ovu odluku objaviti u "Službenom listu RBiH".

Broj 02-111-319/94
26. aprila 1994. godine
Sarajevo

Predsjednik
Predsjedništva RBiH,
Alija Izetbegović, s. r.

209

Na osnovu člana 16. Uredbe sa zakonskom snagom o osnivanju Javnog preduzeća "Aerodromi Republike Bosne i Hercegovine" ("Službeni list RBiH", broj 10/92), na prijedlog Vlade Republike Bosne i Hercegovine, Predsjedništvo Republike Bosne i Hercegovine, na sjednici od 26. aprila 1994. godine, donijelo je

ODLUKU

O IMENOVANJU DIREKTORA JAVNOG PREDUZEĆA "AERODROMI BOSNE I HERCEGOVINE" SARAJEVO

I

Za direktora Javnog preduzeća "Aerodromi Republike Bosne i Hercegovine" Sarajevo imenuje se dipl. ecc. BAKIR KARAHASANOVIĆ.

II

Ovu odluku objaviti u "Službenom listu RBiH".

Broj 02-111-320/94
26. aprila 1994. godine
Sarajevo

Predsjednik
Predsjedništva RBiH,
Alija Izetbegović, s. r.

210

Na osnovu člana 15. Uredbe sa zakonskom snagom o vršenju inostranih poslova ("Službeni list RBiH", broj 18/92), na prijedlog Vlade Republike Bosne i Hercegovine, Predsjedništvo Republike Bosne i Hercegovine, na sjednici od 26. aprila 1994. godine, donijelo je

ODLUKU

O POSTAVLJENJU AMBASADORA REPUBLIKE BOSNE I HERCEGOVINE U STALNOJ MISIJI PRI KEBS-u

I

Za ambasadora Republike Bosne i Hercegovine, u Stalnoj misiji pri KEBS-u, postavlja se MAHIR HADŽIAHMETOVIĆ.

II

Ovu odluku objaviti u "Službenom listu RBiH".

Broj 02-111-321/94
26. aprila 1994. godine
Sarajevo

Predsjednik
Predsjedništva RBiH,
Alija Izetbegović, s. r.

211

Na osnovu Amandmana LI tačka 5. stav 3. na Ustav Republike Bosne i Hercegovine, Predsjedništvo Republike Bosne i Hercegovine, na sjednici od 5. maja 1994. godine, donijelo je

ODLUKU

O RAZRJEŠENJU I IZBORU PREDSJEDNIKA I SUDIJA OSNOVNOG SUDA U MAGLAJU

I

Razrješava se dužnosti sudije Osnovnog suda u Maglaju MARIJAN JUKIĆ, radi nedolaska na posao od 24. juna 1993. godine.

II

Za predsjednika Osnovnog suda u Maglaju bira se AMIR KARAMEHIĆ, dosadašnji sudija Osnovnog suda u Maglaju.

III

Za sudiju Osnovnog suda u Maglaju bira se FUAD PINJIĆ iz Maglaja.

IV

Ovu odluku objaviti u "Službenom listu RBiH".

Broj 02-111-335/94
5. maja 1994. godine
Sarajevo

Predsjednik
Predsjedništva RBiH,
Alija Izetbegović, s. r.

212

Na osnovu Amandmana LI tačka 5. stav 3. na Ustav Republike Bosne i Hercegovine, Predsjedništvo Republike Bosne i Hercegovine, na sjednici od 5. maja 1994. godine, donijelo je

ODLUKU

O RAZRJEŠENJU ZAMJENIKA REPUBLIČKOG JAVNOG PRAVOBRANIOCA

I

Razrješava se dužnosti zamjenika Republičkog javnog pravobranioaca MUNIRA MILIŠIĆ, na lični zahtjev, radi upisa u Imenik advokata.

II

Ovu odluku objaviti u "Službenom listu RBiH".

Broj 02-111-337/94
5. maja 1994. godine
Sarajevo

Predsjednik
Predsjedništva RBiH,
Alija Izetbegović, s. r.

213

Na osnovu Amandmana LI tačka 5. stav 3. na Ustav Republike Bosne i Hercegovine i člana 61. Uredbe sa zakonskom snagom o obrazovanju i radu okruga ("Službeni list RBiH", br. 12/92, 14/92, 18/92, 21/92, 3/93 i 22/93), Predsjedništvo Republike Bosne i Hercegovine, na sjednici od 5. maja 1994. godine, donijelo je

ODLUKU

O IZBORU RATNIH PREDSEDNIŠTAVA SKUPŠTINA
OPŠTINA BANJALUKA, PRIJEDOR I LAKTAŠI

I

Za predsjednika i članove ratnog predsjedništva Skupštine opštine Banjaluka biraju se:

1. ROBOVIĆ IBRAHIM, za predsjednika
2. GUŠIĆ MINKA, za dopredsjednika
3. MUHEDINOVIĆ MIDHAD, za člana
4. BABUL RASIM, za člana
5. HAJRULAHović SUAD, za člana
6. KALKAN RASIM, za člana
7. FAZLIĆ EMIR, za člana
8. DŽONLIĆ AMIR, za člana
9. SARIĆ IMRAN, za člana
10. ARNAUTOVIĆ SANDRA, za člana
11. KONOFSKI TOMISLAV, za člana

II

Za predsjednika i članove ratnog predsjedništva Skupštine opštine Prijedor biraju se:

1. MEDUNJANIN ANES, za predsjednika
2. BEŠIĆ MUHAMED, za dopredsjednika
3. dr MIRZA MUJADŽIĆ, za člana
4. mr SADIĆ BEŠIREVIĆ, za člana
5. MAHMULJIN SAKIB, za člana
6. ČUSKIĆ FIKRET, za člana
7. MEHINOVIĆ ŠEFIK, za člana (predsjednik IO opštine)
8. ĆIRKIN SEAD, za člana
9. RAMIĆ MUHAREM, za člana (sekretar odbrane)
10. SIKIRIĆ ALIJA, za člana (komandant Štaba CZ)
11. PAŠALIĆ ŠEFIKA, za člana

III

Za predsjednika i članove ratnog predsjedništva Skupštine opštine Laktaši biraju se:

1. ČATIĆ MUHAREM, za predsjednika
2. VREBAC KASIM, za dopredsjednika
3. HOTILOVAC FERID, za člana

IV

Ovu odluku objaviti u "Službenom listu RBiH".

Broj 02-111-338/94
5. maja 1994. godine
Sarajevo

Predsjednik
Predsjedništva RBiH,
Alija Izetbegović, s. r.

214

Na osnovu Amandmana LI tačka 5. stav 3. na Ustav Republike Bosne i Hercegovine i člana 61. Uredbe sa zakonskom snagom o obrazovanju i radu okruga ("Službeni list RBiH", br. 12/92, 14/92, 18/92, 21/92, 3/93 i 22/93), Predsjedništvo Republike Bosne i Hercegovine, na sjednici od 5. maja 1994. godine, donijelo je

ODLUKU

O IZBORU RATNOG PREDSEDNIŠTVA
SKUPŠTINE OPŠTINE BRČKO

I

U ratno predsjedništvo Skupštine opštine Brčko biraju se:

1. SAKOVIĆ ŠEMSO, za predsjednika
2. JURIŠIĆ MATO, za dopredsjednika

3. JUSUFOVIĆ MUNIB, predsjednik Izvršnog odbora opštine, za člana
4. KAMENJAŠEVIĆ OMER, načelnik Odjeljenja Ministarstva odbrane, za člana
5. TAHTO HALIL, načelnik SJB, za člana
6. HADŽIMAHOVIĆ REMZIJA, komandant Štaba CZ, za člana
7. Dr RAMIĆ IBRAHIM, predsjednik Kluba odbornika SDA, za člana
8. DAPO MIRSAD, predsjednik Kluba odbornika SDP, za člana
9. FRANJO ČANČAREVIĆ, predsjednik Kluba odbornika HDZ, za člana
10. MARKO LAZIĆ, zamjenik predsjednika Izvršnog odbora opštine, za člana
11. KRNDELJ IVAN, za člana.

IV

Ovu odluku objaviti u "Službenom listu RBiH".

Broj 02-111-341/94
5. maja 1994. godine
Sarajevo

Predsjednik
Predsjedništva RBiH,
Alija Izetbegović, s. r.

215

Na osnovu Amandmana LI tačka 5. stav 3. na Ustav Republike Bosne i Hercegovine, Predsjedništvo Republike Bosne i Hercegovine, na sjednici od 5. maja 1994. godine, donijelo je

ODLUKU

O RAZRJEŠENJU I IMENOVANJU OSNOVNOG
JAVNOG TUŽIOCA U MAGLAJU

I

Razrješava se dužnosti Osnovnog javnog tužioca u Maglaju ILIJA VODOVIĆ, radi nedolaska na posao od 24. juna 1993. godine.

II

Za osnovnog javnog tužioca u Maglaju imenuje se SENAD HASANIC iz Maglaja.

III

Odluku objaviti u "Službenom listu RBiH".

Broj 02-111-342/94
5. maja 1994. godine
Sarajevo

Predsjednik
Predsjedništva RBiH,
Alija Izetbegović, s. r.

216

Na osnovu čl. 2. i 16. Zakona o pomilovanju ("Službeni list SRBiH", broj 6/91) i člana 49. stav 2. Poslovnika Predsjedništva Republike Bosne i Hercegovine, Predsjedništvo Republike Bosne i Hercegovine, na sjednici od 5. maja 1994. godine, donijelo je

ODLUKU

O ABOLICIJI PO SLUŽBENOJ DUŽNOSTI

I

Oslobadaju se od daljeg krivičnog gonjenja, odnosno daljeg izvršenja kazne zatvora u cilju razmjene za lica zarobljena od strane agresora:

01. Drinčić Miroslav
02. Novaković Slobodan
03. Obućina Nedo
04. Hrnjez Ljubica
05. Guzina Anika
06. Hrnjez Obren
07. Šipovac Milimir
08. Šipovac Milisav
09. Ždero Đuro
10. Rudić Nedjeljko
11. Kusić Dragan

12. Kusić Miodrag
13. Kusić Mile
14. Žugić Dragan

II

Odluku će provesti Državna komisija za razmjenu ratnih zarobljenika a ista stupa na snagu danom izvršene razmjene.

III

Odluku objaviti u "Službenom listu RBiH".

Broj 02-111-343/94
5. maja 1994. godine
Sarajevo

Predsjednik
Predsjedništva RBiH,
Alija Izetbegović, s. r.

217

Na osnovu člana 2d. stav 2. Uredbe sa zakonskom snagom o primjeni Zakona o prekršajima za vrijeme neposredne ratne opasnosti ili za vrijeme ratnog stanja ("Službeni list RBiH", br. 6/92, 12/92, 21/92 i 19/93), ministar pravosuđa i uprave, donosi

RJEŠENJE

1. Osnovni sud u Mostaru vršiće funkciju Višeg suda za prekršaje u Mostaru, za područje opština: Bileća, Čapljina, Čitluk, Gacko, Grude, Široki Brijeg, Ljubinje, Ljubuški, Mostar, Neum, Nevesinje, Posušje, Stolac i Trebinje.

2. Ovo rješenje objaviće se u "Službenom listu RBiH".

Broj 01-70-103/94
1. maja 1994. godine
Sarajevo

Ministar
prof. dr Kasim Trnka, s. r.

Ustavni sud Bosne i Hercegovine

Ustavni sud Bosne i Hercegovine, na osnovu člana 387. stav 1. Ustava Republike Bosne i Hercegovine i člana 72. tačka 3. Poslovnika Ustavnog suda Bosne i Hercegovine, na sjednici održanoj 17. 2. 1994. godine, donio je

ODLUKU

Ukida se Dogovor o uslovima nabavke, unosa, uvoza i distribucije roba u grad Sarajevo, kojeg su 1. 8. 1993. godine zaključili Ministarstvo robnog prometa, Ministarstvo finansija - Devizni inspektorat, Centar službi bezbjednosti Sarajevo, Služba društvenog knjigovodstva Bosne i Hercegovine - Finansijska policija, Carinska uprava Sarajevo i Izvršni odbor grada Sarajeva.

Ova odluka objaviće se u "Službenom listu RBiH" i u "Službenim novinama grada Sarajeva".

Obrazloženje

Prijedlogom Republičkog javnog tužilaštva, od 28. 10. 1993. godine, pokrenut je postupak za ocjenjivanje ustavnosti i zakonitosti navedenog dogovora.

Osporenim dogovorom utvrđene su, između ostalog, mjesečne potrebe građana Sarajeva za osnovnim prehrambenim artiklima i robe koje će se prodavati putem trgovine. Uvoznici se obavezuju da u vrijednosti unosa obezbijede 20% učešća osnovnih prehrambenih artikala i stave ih na raspolaganje Gradu. Plaćanje roba Grad vrši po nabavnoj cijeni uvoznika franco dobavljač (tačka 2. i 3.). Uvoznici robu u Grad dovoze koristeći usluge humanitarnih organizacija koje su ovlaštene za ovu djelatnost (tačka 4.). Maksimalna maloprodajna cijena uvezenih roba je 1:3,5 u odnosu na fakturu cijenu dobavljača (tačka 6.). Kod kontrole ulaska roba neće se dozvoliti ulaz robama iz agresorskih zemalja (tačka 8. stav 2.). Uvoznici će svoje poslovanje obavljati u skladu sa važećim zakonskim propisima i ovim dogovorom (tačka 10.).

Predlagatelj smatra da je Dogovor u nesaglasnosti sa Ustavom jer za njegovo zaključivanje nije postojao ustavni osnov.

Prema Ustavu Republike Bosne i Hercegovine (član 376.) i Zakonu o državnoj upravi - Prečišćeni tekst ("Službeni list RBiH", br. 8/90, 22/90, 10/91 i 14/91 i "Službeni list RBiH", br. 4/92, 21/92 i 3/93) funkcioneri koji rukovode republičkim organima uprave mogu donositi pravilnike, naredbe i uputstva za izvršavanje republičkih zakona, drugih propisa i opštih akata Skupštine RBiH i propisa Vlade, ako su za to ovlašteni tim propisima, odnosno aktima (član 118.). Zakonom o državnoj upravi je i propisano da izvršni organ ima pravo i dužnost da, između ostalog, donosi propise za izvršavanje zakona, drugih propisa i opštih akata skupštine društveno-političke zajednice (član 17. alineja 5.).

Iz navedenih ustavnih i zakonskih odredaba proizilazi da propisi izvršnih organa imaju karakter izvršnih propisa. Isti karakter imaju i propisi funkcionera koji rukovode republičkim organima uprave i mogu se donositi samo ako za to postoji izričito ovlaštenje u zakonu, drugom propisu i opštem aktu. U konkretnom slučaju organi koji su zaključili Dogovor za to nisu imali osnov u propisima.

Prema Uredbi sa zakonskom snagom o prihvatanju Rezolucije 757 Savjeta bezbjednosti od 30. maja 1992. godine ("Službeni list RBiH", broj 8/93) hrana, humanitarna pomoć i proizvod medicinske namjene izuzeti su od embarga, pa se stoga odredbom tačke 8. stav 2. Dogovora, koja se odnosi na hranu, nije mogla propisati zabrana "ulaska" u Grad ove vrste robe iz agresorskih zemalja.

Osim toga Dogovor nije objavljen u službenom glasilu, što je ustavna obaveza i uslov za njegovo stupanje na snagu i primjenjivanje (čl. 219. i 220. Ustava).

Iz navedenih razloga odlučeno je kao u dispozitivu ove odluke.

Odluka U broj 25/93
17. februara 1994. godine
Sarajevo

Predsjednik
Ustavnog suda BiH,
prof. dr Ismet Dautbašić, s. r.

SLUŽBENE OBJAVE

PROGLAŠENJE UMRLIM

Osnovni sud II u Sarajevu i to sudija Šabanović Aida u vanparničnom predmetu predlagača Georgijević Zorana, iz Sarajeva, radi dokazivanja smrti, na osnovu čl. 65. i 62. ZVP RBiH, izdaje

OGLAS

Georgijević Špiler Borislava, rođena 16. 04. 1927. godine u Travniku sa posljednjim prebivalištem u Sarajevu u Ul. Braštva jedinstva 21 navodno je umrla dana 04. 05. 1992. godine u Centru za zaštitu punoljetnih lica u Nedžarićima.

Poziva se Georgijević Špiler Borislava, kao i svako drugo lice koje bilo šta zna o njenom životu ili smrti da se u roku od 30 dana od objavljivanja oglasa u "Službenom listu RBiH" javi Osnovnom sudu II u Sarajevu, Šenoina 1, soba 21.

Po isteku roka od 30 dana sud će donijeti odluku po prijedlogu za dokazivanje smrti. (so-116/94)

Osnovni sud I u Sarajevu poziva MARKOVIĆ ANDELKA, sin Spasoja i majke Mare rođene Filipović, rođen 03. 10. 1938. u Ustikolini SO Foča da se javi ovom sudu u roku od 60 dana od dana objavljivanja oglasa.

U isto vrijeme poziva se svaka osoba koja ma šta zna o životu ili smrti Marković Anđelka, sin Spasoja i majke Mare rođene Filipović da se javi ovom sudu u istom roku.

Nestali Marković Anđelko nestao je kod Božića pumpe u Brijesku kod Sarajeva i o njegovom životu ili smrti se ne zna ništa.

Po isteku roka oglašavanja nestali Marković Anđelko bit će proglašen umrlim. (so-122/94)

Osnovni sud I u Sarajevu, poziva IVANA MERLO, sina Cezara i majke Marije rođ. Kulirer, rođ. 28. 12. 1907. godine u Sarajevu, da se javi ovome sudu u roku od 30 dana od dana objavljivanja oglasa.

U isto vrijeme poziva se svaka osoba koja ma šta zna o životu i smrti umrlog Ivana Merlo da se javi ovome sudu u istom roku.

Umrli Ivan Merlo je navodno nestao 8. aprila 1945. godine u Sarajevu.

Po isteku roka oglašavanja biće proglašen umrli Ivan Merlo. (so-123/94)

Osnovni sud II Sarajevo i to sudija Šabanović Aida u vanparničnom predmetu predlagateljice Detlić Samije iz Sarajeva radi dokazivanja smrti DETLIĆ AHMEDA, na osnovu čl. 62. i 65. Zakona o vanparničnom postupku RBiH, izdaje

OGLAS

Detlić Ahmed sin Hamde, rođen u selu Kovanj-Rogatica 20. 1. 1949. godine sa posljednjim prebivalištem u selu Kovanji Rogatica navodno je poginuo u selu Stjenice dana 2. 8. 1992. godine.

Poziva se sam Detlić Ahmed kao i svako drugo lice koje bilo šta zna o njegovom životu ili njegovoj smrti da se u roku od 30 dana od objavljivanja oglasa u "Službenom listu RBiH"

javi Osnovnom sudu II Sarajevo ul. Šenoina br. 1, soba broj 21.

Po isteku roka od 30 dana sud će donijeti odluku po prijedlogu za dokazivanje smrti. (so-125/94)

Osnovni sud I Sarajevo poziva FEJZović ŠAČIRA, sina Smaje i majke Behije rođene Pisknjač, rođen 17. 01. 1959. u selu Svrake, SO Vogošća da se javi ovom sudu u roku od 30 dana od dana objavljivanja ovog oglasa.

U isto vrijeme poziva se svaka osoba koja ma šta zna o životu ili smrti nestalog Fejzović Šaćira, sina Smaje, koji je nestao 03. 05. 1992. godine u selu Svrakama SO Vogošća da se javi ovom sudu u istom roku.

Nestali Fejzović Šaćir sin Smaje nestao je u Selu Svrakama-Semizovac SO Vogošća i od tada pa do danas o njegovom životu ili smrti se ne zna ništa.

Po isteku roka oglašavanja nestali Fejzović Šaćir bit će proglašen umrlim. (so-124/94)

OGLASNI DIO

DA BI SE IZBJEGLA SVAKA ZLOUPOTREBA SLJEDEĆA DOKUMENTA SE OGLAŠAVAJU NEVAŽEĆIM

SARAJEVO

Zečić Omer, diploma Ekonomskog fakulteta izdata u Sarajevu (so-1121/94)

Zečević Taisa, diploma Fakulteta političkih nauka izdata u Sarajevu (so-121/94)

Pecikoza Edita, svjedočanstvo o završenoj školi krojač-III stepena, izdato od Škola učenika u privredi "Branko Lazić" Sarajevo

Uvjerjenje za rad "BUTIK EDITA" odnosno odobrenje izdato od SO Ilidža, vlasnik Pecikoza Edita.

Rješenje za rad "BUTIK EDITA" izdato od SO Ilidža, vlasnik Pecikoza Edita. (so-121/1/94)

PUTNE ISPRAVE

Ministarstvo unutrašnjih poslova Sarajevo objavljuje nevažećim sljedeće putne isprave:

- pasoš broj BH-044386 izdat 19. 10. 1993. godine u SJB Tuzla na ime Dautović Muhamed (pasoš proglašen nevažećim rješenjem CSB Tuzla broj 18-1/09-4-209/94 od 23. 4. 1994. godine),

- pasoš broj BH-045255 izdat 9. 4. 1993. godine u SJB Lukavac, na ime Ibrić Mehmedalija (pasoš proglašen nevažećim rješenjem CSB Tuzla, broj 18-1/09-4-194/94 od 19. 4. 1994. godine),

- pasoš broj BH-048138 izdat 29. 4. 1993. godine u SJB Lukavac, na ime Ibrić Šaćir (pasoš proglašen nevažećim rješenjem CSB Tuzla, broj 18-1/09-4-195/94 od 19. 4. 1994. godine. (so-119/94)

Ministarstvo unutrašnjih poslova Sarajevo objavljuje nevažećim sljedeće putne isprave:

- pasoš broj: BH-189810 izdat 8. 8. 1993. godine u GK RBiH - Stuttgart, na ime Behrić Arif;

- pasoš broj: BH-444181 izdat 25. 8. 1993. godine u GK RBiH - Stuttgart, na ime Pašić Nedid;

- pasoš broj: BH-471939 izdat 16. 11. 1993. godine u GK RBiH - Stuttgart, na ime Murtić Ferid.

Navedene putne isprave su proglašene nevažećim rješenjem Generalnog konzulata RBiH u Stuttgartu, broj: V-SS-432/94 od 13. 4. 1994. godine. (so-118/94)

SADRŽAJ

192	Uredba sa zakonskom snagom o dopunama Uredbe sa zakonskom snagom o Službi društvenog knjigovodstva	149	208	Odluka o razrješenju sudije Višeg suda za prekršaje u Sarajevu	172
193	Uredba sa zakonskom snagom o bankama	149	209	Odluka o imenovanju direktora Javnog preduzeća "Aerodromi Bosne i Hercegovine" Sarajevo	172
194	Uredba sa zakonskom snagom o sanaciji, stečaju i likvidaciji banaka	155	210	Odluka o postavljenju ambasadora Republike Bosne i Hercegovine u Stalnoj misiji pri KEBS-u	172
195	Uredba sa zakonskom snagom o tržištu novca i tržištu kapitala	157	211	Odluka o razrješenju i izboru predsjednika i sudija osnovnog suda u Maglaju	172
196	Uredba sa zakonskom snagom o vrijednosnim papirima	158	212	Odluka o razrješenju zamjenika republičkog javnog pravobranioca	172
197	Uredba sa zakonskom snagom o deviznom poslovanju	161	213	Odluka o izboru ratnih predsjedništava Skupština opština Banjaluka, Prijedor i Laktaši	173
198	Uredba sa zakonskom snagom o nedepozitnim finansijskim organizacijama	165	214	Odluka o izboru ratnog predsjedništva Skupštine opštine Brčko	173
199	Uredba sa zakonskom snagom o Agenciji Republike Bosne i Hercegovine za osiguranje depozita i sanaciju banaka	166	215	Odluka o razrješenju i imenovanju osnovnog javnog tužioca u Maglaju	173
200	Uredba sa zakonskom snagom o privremenim mjerama organiziranja određenih preduzeća i drugih pravnih lica	168	216	Odluka o aboliciji po službenoj dužnosti	173
201	Uredba sa zakonskom snagom o kontroli cijena	169	217	Rješenje Osnovnog suda u Mostaru o vršenju funkcije Višeg suda za prekršaje u Mostaru za područja opština: Bileća, Čapljina, Čitluk, Gacko, Grude, Siroki Brijeg, Ljubinje, Ljubuški, Mostar, Neum, Nevesinje, Posušje, Stolac i Trebinje	174
202	Uredba sa zakonskom snagom o obustavi od primjene stava 9. tačke 4. Amandmana LI na Ustav Republike Bosne i Hercegovine	170		USTAVNI SUD BOSNE I HERCEGOVINE	
203	Odluka o razrješenju i izboru predsjednika i sudija redovnih sudova	170		Odluka o ukidanju Dogovora o uslovima nabavke, unosa, uvoza i distribucije roba u grad Sarajevo, kojeg su 1. 8. 1993. godine zaključili Ministarstvo robnog prometa, Ministarstvo finansija - Devizni inspektorat, Centar službi bezbjednosti Sarajevo, Služba društvenog knjigovodstva Bosne i Hercegovine - Finansijska policija, Carinska uprava Sarajevo i Izvršni odbor grada Sarajeva	174
204	Odluka o razrješenju i imenovanju javnih tužilaca	171			
205	Odluka o aboliciji po službenoj dužnosti	171			
206	Odluka o postavljenju ambasadora Republike Bosne i Hercegovine u Švedskoj	171			
207	Odluka o postavljenju ambasadora Republike Bosne i Hercegovine u Sjedinjenim Američkim Državama	172			